

Inissianik attartortitsisarneq pillugu Inatsisartut peqqussutaat

Illussaqartitsineq, boligstøtte, illunik attartorneq il.il. pillugit Kalaallit Nunaannut inatsit nr. 944, 23. december 1986-imeersoq naapertorlugu aalajangersarneqarput:

Kapitali 1

Atuuffissaa

§ 1. Peqqussutip atuuffigisaa tassaavoq illunik illunilu ineeqqanik inigisassanik attartortitsineq, attartukkanik attartortitseqqinneq ilanngullugu, tamatumani aningaasaanik allaanerusunik akiliuteqartarnersoq aamma inissiap ilaa inissiatuunngitsoq attartortinneqarnersoq apeqquatainnagu, taamaattorli tak. imm. 2.

Imm. 2. Peqqussut taamaallaat attartornermi pissutsinut atuuppoq, attartortoq inuttut namminiussuseqarpat.

§ 2. Attartornissaq isumaqatigiissutigineqartassaaq immersugassaq Naalakkersuisunit akuerisaalluni kalaallisut qallunaatullu naqitaasoq atorlugu.

Imm. 2. Attartornermi isumaqatigiissummi allataasumi aalajangersakkat peqqussummi taaneqartunit annertunerusumik attartortumut pisussaffeqartitsiviusut imaluunniit annikinnerusumik attartortumut pisinnaatitaaffeqartitsiviusut atuutsinneqassappata, tamanna erseqqissaatigineqassaaq.

Imm. 3. Isumaqatigiissuteqarnikkut imm. 1-mi aamma 2-mi aalajangersakkat attartortumut ajoqutaasussamik sanioqqunneqarsinnaanngillat.

§ 3. Peqqussut attartornernut, immikkut inatsisiliaasunit aqutaasunut atuutsinneqanngilaq, imaluunniit inissianut ukununga atuutsinneqassanani:

1) Namminersornerullutik Oqartussat inissiaataannut attartortittakkanut Naalakkersuisunit ilaajunnaarsinneqarsimasunut

2) kommunep inissiaataanut attartortittakkanut kommunalbestyrelsimit ilaajunnaarsinneqarsimasunut, taamaattorli tak. imm. 2.

3) Namminersornerullutik Oqartussat kommunellu ilinniartut ilinniarnernannut atatillugu atugassiissapput, taamaattorli tak. imm. 3.

Imm. 2. Inissianut imm. 1, nr. 2-mi pineqartunut Nunap Karsianit sananeqarnerminnut tapiiffigineqarsimasunut ilaajunnaarsitsinissamut Naalakkersuisut akuersissuteqanissaat piumasqaataavoq.

Imm. 3. Naalakkersuisut Kalaallit Nunaanni Kommunit Kattuffiannik isumasioqateqareerlutik inissiat imm. 1, nr. 3-mi taaneqartut pillugit maleruagassanik erseqqinnerusunik aalajangersaasinnaapput, matumani ilanngullugit attartornermut isumaqatigiissutini piumasaqaatit atugassarititaasullu.

§ 4. Peqqussut utaqqiisaagallartumik inigitinneqartunut atuutinngilaq, taamaattorli tak. § 20, imm. 1, nr. 3. *Imm. 2.* Peqqussut Namminersornerullutik Oqartussat kommunelluunniit inissiaataanni utaqqiisaasumik sulisunut inigitinneqarallartunut tunngassuteqartunut atuutinngilaq, tamatumani apeqquataatinnagu inissiinermut akiliuteqartitsisoqartarnersoq akiliuteqartitsisoqartannginnorsorluunniit, taamaattorli tak. imm. 3 aamma 4.

Imm. 3. Namminersornerullutik Oqartussani kommuneniluunniit sulisunik inissianut utaqqiisaasumik sulisunut inigitinneqarallartunut inissinneqarallartoq sullissinermut akiliummik akiliuteqartinneqarsinnaavoq, tak. imm. 2.

Imm. 4. Utaqqiisaagallartumik inigitinneqartartut aquneqarnerat ingerlanneqarnerallu pillugit Naalakkersuisut maleruagassiorsinnaapput, matumani akiliutigineqartartussat annertussusissaat kiisalu inissiigallarnermi aningaasartuutaasut matussusiivigineqarnissaat ilanngullugit.

Kapitali 2

Innersuussissarnermi maleruagassat

§ 5. Illuutini Namminersornerullutik Oqartussanit kommunenilluunniit pigineqartuni inissiat inigineqanngitsut inissarsiortunut imatut tulleriinnilersuilluni innersuunneqartassapput, inissiat:

- 1) iluarsaassinernut isaterinernullu atatillugu Namminersornerullutik Oqartussat kommunellu inisseeqqinnissaannut atugassat, tak. § 67.
 - 2) attartortunut iniminnik piginneqatigiilluni inissiatut pigisatulluunniit tiguserusunngitsunut, tak. § 24, imm. 1.
 - 3) initaartinneqarnissamik siusinnerusukkut qularnaveeqqusiivigineqarsimasunut eqquutsitsiniarluni innersuunneqartussat, tak. § 57, imm. 4.
 - 4) aapparisaq toqukkut qimagaasup atorfirmut aalajangersimasumut inigitinneqartumik qimatsinissaanut atatillugu innersuussutigineqartussat, tak. § 62, imm. 2.
 - 5) aapparisaq toqukkut qimagaasup inimik innarluutilimmut immikkut aaqqissugaasumik tunniussaasimasumillu qimatsinissaanut atatillugu innersuussutigineqartussat, tak. § 62, imm. 3.
 - 6) siunertanut aalajangersimasunut inniminnigaasut, tak. § 3, imm. 1, nr. 1 aamma 2.
 - 7) sullissivinni sulisunut inissamut normumik atorneqanngitsumik pigisaqartunut atugassat, tak. § 9,
 - 8) kommunet isumaginninnermi inissaqartitsinissaannut atugassat, tak. § 23,
 - 9) nammineq kissaatigalugu nuunniartunut atugassat, tassunga ilanngullugu inigisanik paarlaannerit, tak. § 58,
 - 10) utaqqisut allattorsimaffianni nalinginnaasumi allassimallutik inissarsiortunut atugassat, tak. § 6.
- Imm. 2.* Imm. 1, nr. 1 – 5 naapertorlugu inissiat innersuunneqartut naleqquttumik angissuseqartinniarneqassapput pitsaassuseqassallutilu. Ineqarnermut aningaasartuutit tamarmiusut sapinngisamik inissiami qimanneqartumi aningaasartuutaasarsimasunit amerlanerunissaat pinngitsoorniarneqassaaq.
- Imm. 3.* Namminersornerullutik Oqartussat kommunelluunniit siunertanut aalajangersimasunut

atugassanik inissianik inniminniisinnaapput, tassunga ilanngullugit inissiat atorfinnut aalajangersimasunut atugassiissutigineqartussat.

Imm. 4. Naalakkersuisut kommunet ataasiakkaat isumaqatiginiareerlugit inissiat imm. 1-imi taagorneqartut qanoq agguarneqarnissaat pillugu kommunenut tamanut immikkut aalajangersaasinnaapput.

§ 6. Utaqqisut allattorsimaffianni nalinginnaasumi inissarsiorlutik allatsissimasut inissiamut immikkut kissaateqarsinnaapput, tassani pineqarlutik inissiap akia, inissisimaffissaa, taassuma ataani init quleriit arlaannut inissikkusunneq kiisalu angissusissaq, inissiap angissusia inoqutigiinni inuit amerlassusiinut naapertuuppat.

Imm. 2. Utaqqisut allattorsimaffianni nalinginnaasumi, allamut nuunnissamik kissaateqartut allattorsimaffianni kiisalu paarlaateqateqarniarlutik utaqqisut allattorsimaffianni inissarsiorlutik allatsissimasut inissiamik innersuussinermi inoqutigiinni inuit amerlassusii ataatsimik sinnerlugit initalimmik neqerooruteqartoqarsinnaavoq, tak. § 19.

Imm. 3. Najukkami inissianik attartortitsiniarneq ajornakusoortinneqartoq paasinarsippat, inissiamik inoqutigiinni inuit amerlassusii ataatsimik marlunnilluunniit sinnerlugit initalimmik neqerooruteqartoqarsinnaavoq.

§ 7. Inissamik innersuussinermi attartortitsisup attartortussaq isertitai pigisaalu pillugit paasissutissanik piumasaqarfigisinnaavaa, attartortoq ineqarnermut aningaasartuutinik ingerlaavartunik kiisalu qulaarnaveequsiissutissamik akiliisinnaanersoq pillugu naliliiniarnermut atugassanik.

Imm. 2. Inissarsiortoq utaqqisut allattorsimaffiannut ilaatinneqarnerminut akiliuteqartinneqartassaaq, aammalu ukiut tamaasa allatsissimanerup ingerlaqqiinnarnissaanik uppersaasnermini akiliuteqartinneqartassalluni.

Imm. 3. Naalakkersuisut inissianik innersuussisarneq attartortitsisarnerlu, akiligassat akilersinniarneqartarnissaat akitsuutillu annertussusissaat, kiisalu utaqqisut allattorsimaffinik aqutsinissaq, taassumalu ataani utaqqisut allattorsimaffisa inissianut sunut ataneri suussusiilu pillugit maleruagassiorsinnaapput, tak. § 5, imm. 1.

§ 8. § 5, imm. 4-mi allassimasut apeqqutaatinnagit sulisunut inissiat inigineeruttut 20 %-ii sulisunut, nammineq kissaatigisamik nuunnissamut utaqqisut allattorsimaffiannut allatsissimasunut innersuunneqartassapput. Sulisut inissiamut immikkut kissaateqarsinnaapput, tassani pineqarlutik inissiap akia, inissisimaffissaa, taassuma ataani init quleriit arlaannut inissikkusunneq kiisalu angissusissaq, inissiap angissusia inoqutigiinni inuit amerlassusiinut naapertuuppat.

Imm. 2. Nammineq kissaatigisamik nuunnissamut utaqqisut allattorsimaffiani sulisunik allatsissimasoaqanngippat, sulisunut inissiat inueruttut § 5-imi taaneqartutut innersuunneqarsinnaapput.

§ 9. Naalakkersuisut inissianut normunik aalajangersimasunik amerlassusilinnik, sulisunut atorfeqarnermi inissiamik innersuussiffigineqarsinnaatitaasunut, tak. § 5, imm. 1, nr. 7, Namminersornerullutik Oqartussat inissiaataanniit tunniussassanik agguaaassisinnaapput. Inissianut normunut tunniunneqarsimasunut sulitsisoq, inissianut normunik pigisaqartoq ukiumoortumik akiliuteqartinneqarsinnaavoq.

Imm. 2. Aammattaaq Namminersornerullutik Oqartussani sulisunut inissiat aqunneqarnerinut akiliuteqartitsisoqarsinnaavoq, aqutsinermi aningaasartuutiviusunut matusissutissanik.

Imm. 3. Naalakkersuisut Namminersornerullutik Oqartussani sulisunut inissiat aqunneqarneri ingerlanneqarnerilu pillugit maleruagassiorsinnaapput, matumani ilanngullugit ukiumoortumik sullissinermut akitsuusiissutaasartut kiisalu allaffissornikkut aqutsinermut akitsiisiissutaasartussap angissusissaasa aalajangersaavigineqartarnissaat.

§ 10. Naalakkersuisut inissianut normunik aalajangersimasunik amerlassusilinnik, sulisunut atorfeqarnermi inissiamik innersuussiffigineqarsinnaatitaasunut, tak. § 5, imm. 1, nr. 7, kommunalbestyrelsemut tunniussisinnaapput.

Imm. 2. Kommunalbestyrelsip kommunemi taassumaluunniit sullissiviini atorfillit, inissiaq kommunep inissiaataannut attartortittakkanut ilaalluni sulisunut inissianut attuumassuteqarpat, inoqutigiinni inuit amerlassusaat inimik ataatsimik sinnerlugit tunineqassanersut aalajangersinnaavaa.

Imm. 3. Kommune sulisunut inissianik agguuassinermi aqutsineq tulleriiaarinermilu tunngavissat pillugit sukumiisunik aalajangersaasinnaavoq. Maleruagassat taamaattut Naalakkersuisunit akuerineqassapput.

§ 11. Naalagaaffiup Sinniisoqarfiani, Nunatta Eqqartuussiviani, Kalaallit Nunaanni Politimestereqarfimmi sullissivinnilu taakkununga atasuni sulisunut, inissiamik innersuussiffigineqarsinnaatitaallutik atorfeqarlutik sulisunut inissiat innersuunneqartassapput, Naalakkersuisut aamma Naalagaaffiup Sinniisoqarfia, Nunatta Eqqartuussiviata kiisalu Kalaallit Nunaanni Politimestereqarfiup isumaqatigiissuteqarnerisigut.

Imm. 2. Inissiat imm. 1-imi taaneqartut inissiap piniarneqarneraniit kingusinnerpaamik qaammatit pingasut qaangiunnerini innersuunneqartarnissaat anguniarneqartassaaq.

Imm. 3. Sullissivinni imm. 1-imi taaneqartuni sulisunut inissianik innersuussisarnissamut pisussaaffik eqqortinniarlugu Namminersornerullutik Oqartussat inissianik arlalinnik inniminniisarsinnaapput.

Imm. 4. Sullissivinni imm. 1-imi taaneqartuni pisortatut sulisunut pisortanut inissianik innersuussisoqarsinnaavoq, tamanna pillugu Naalakkersuisunut aalajangersimasumik isumaqatigiissuteqarnikkut.

§ 12. Inissiat Inatsisartuni sullissivinnilu taakkununga attuumassuteqartuni sulisunut inissamik innersuunneqarsinnaatitaallutik atorfinitsitaasimasunut inissiat, kiisalu inissiat allat Inatsisartunut atorneqartussat innersuunneqartassapput, Naalakkersuisut Inatsisartullu isumaqatigiissuteqarnerat naapertorlugu.

Imm. 2. Sullissivinni imm. 1-imi taaneqartuni sulisunut inissianik innersuussisarnissamut pisussaaffik eqqortinniarlugu, Namminersornerullutik Oqartussat inissianik arlaqartunik immikkoortitassanik inniminniisarsinnaapput.

Imm. 3. Sullissivinni imm. 1-imi taaneqartuni pisortatut sulisunut pisortanut inissianik innersuussisoqarsinnaavoq, tamanna pillugu Naalakkersuisunik aalajangersimasumik isumaqatigiissuteqarneq naapertorlugu.

Imm. 4. Inatsisartuni sullissivinnilu taakkununga attuumassuteqartuni sulisunut atorfeqarnermi inissamik innersuussiffigineqarsinnaatitaasunut, inissiat §§ 16-18-imi maleruagassat malillugit innersuunneqassapput.

§ 13. Namminersornerullutik Oqartussat inissiaataat, sulisunut atorfeqarnermi inissiamik innersuussiffigineqarsinnaatitaasunut innersuunneqartartussat sisamanut agguagaapput tulleriiaarinerlu una malillugu innersuunneqartassallutik:

- 1) Naalakkersuisoqarfinni ataasiakkaani naalakkersuisunut pisortanullu inissiat, tak. § 14,
- 2) Namminersornerullutik Oqartussat qitiusumik allaffeqarfianni immikkoortortani pisortanut assigisaannullu, akissaateqarfik 37 tassanngaanniilluunniit qaffasinnerusoq naapertorlugu akissarsiaqartinneqartunut inissiat, tak. § 15,
- 3) Namminersornerullutik Oqartussat qitiusumik allaffeqarfianni allaffinni pisortanut, akissaateqarfik 36 tassanngaanniilluunniit qaffasinnerusoq naapertorlugu akissarsiaqartinneqartunut inissiat, tak. § 16,
- 4) Namminersornerullutik Oqartussat qitiusumik allaffeqarfianni, sullissivinni suliffeqarfinnilu tassunga atasuni kiisalu sullissivinni, suliffeqarfinni aammalu aktiaateqarluni ingerlatseqatigiiffinni Namminersornerullutik Oqartussanit pigineqartuni sulisunut allanut atorfeqarnermi inissiamik innersuussiffigineqarnissamik piginnaatitaaffeqartunut inissiat, tak. § 17.

Imm. 2. Naalakkersuisut inunnut §§ 16-imi 17-imilu taaneqartunut inissianik innersuussisarneq pillugu maleruagassiorsinnaapput.

§ 14. Naalakkersuisoqarfinni ataasiakkaani naalakkersuisunut ilaasortanut pisortanullu inissianik innersuussisarnissamut Namminersornerullutik Oqartussat inissianik, Naalakkersuisunut pisortanullu inissiatut taagorneqartunik arlaqartunik immikkoortitassanik inniminniissapput.

Imm. 2. Naalakkersuisunut pisortanullu inissiat, tak. imm. 1, pingaarnerutillugu tassaasassapput ilaqtariinnut ataatsinut illut imaluunniit illut affarleriit.

Imm. 3. Imm. 1-imi taaneqartunut inissianik innersuussinermi inissianut ataasiakkaanut inoqutigiinni inuit qanoq amerlatiginissaat piumasaqaataanngilaq.

Imm. 4. Inissiat imm. 1-imi taaneqartut najugaqatigiiffimmut nammineq ingerlasumut, ingerlatsinermut tapiiffigineqarsinnaasumut imaluunniit ingerlatsinermi immikkut ittumik aningaasartuutitut matusissutissanik tapiiffigineqarsinnaasumut inissinneqassapput.

§ 15. Namminersornerullutik Oqartussat qitiusumik allaffeqarfianni immikkoortortani pisortanut, akissaateqarfik 37 tassanngaanniilluunniit qaffasinnerusoq naapertorlugu akissarsiaqartinneqartunut inissianik innersuussinissamut Namminersornerullutik Oqartussat inissianik, pisortanut inissianik taaneqartartunik arlalinnik inniminniissapput.

Imm. 2. Pisortanut inissiat, tak. imm. 1, pingaartumik tassaasassapput illuni sanileriinni uiguleriinniluunniit inissiat kiisalu ilaqtariinnut ataatsinut illut imaluunniit illut affarleriit.

Imm. 3. Pisortanut inissianik innersuussinermi inissiat inoqutigiinni inuit amerlassusaat, § 19 naapertorlugu naatsorsorneqartut ininik marlunnik sinnerlugit innersuussisoqarsinnaavoq.

§ 16. Namminersornerullutik Oqartussat qitiusumik allaffeqarfianni allaffinni pisortanut, akissaateqarfik 36 tassanngaanniilluunniit qaffasinnerusoq naapertorlugu akissarsiaqartinneqartunut inissiat § 17-imi taaneqartunit salliutinneqarlutik innersuunneqartassapput.

§ 17. Inunnut §§ 11-16-imi taaneqartunut inissianik innersuussinissamut pisariaqartinneqartut naammassineqarpata, inissiat Namminersornerullutik Oqartussat qitiusumik allaffeqarfianni, sullissivinni

suliffeqarfinnilu tassunga atasuni kiisalu sullissivinni, suliffeqarfinni aammalu aktiaateqarluni ingerlatseqatigiiffinni Namminersornerullutik Oqartussanit pigineqartuni sulisunut allanut atorfeqarnermi inissiamik innersuussiffiqeqarsinnaatitaasunut innersuunneqarsinnaapput.

§ 18. Inunnut §§ 12, 16 aamma 17-imi taaneqartunut inissianik piniarnermi innersuussinermilu inissiat imatut innersuussassanngorlugit piniartoqarsinnaavoq:

- 1) Kisimiittut inissiamik marlunnik initalimmik pissarsisinnaatitaapput.
- 2) Aappariit qitornaqanngitsut, kisimiittut ataatsimik qitornallit aamma aappariit ataatsimik qitornallit inissiamik pingasunik initalimmik pissarsisinnaatitaapput.
- 3) Kisimiittut marlunnik qitornallit aamma aappariit marlunnik qitornallit inissiamik sisamanik initalimmik pissarsisinnaatitaapput.
- 4) Kisimiittut pingasunik amerlanerusunilluunniit qitornallit aamma aappariit pingasunik amerlanerusunilluunniit qitornallit inissiamik tallimanik initalimmik pissarsisinnaatitaapput.

Imm. 2. Najukkami inissianik attartortitsiniarneq ajornakusoortinneqartoq paasinarpas, inissiamik inoqutigiinni inuit amerlassusii ataatsimik marlunnilluunniit sinnerlugit initalimmik qaqutigunnaq immikkut ittumik tunniussisoqarsinnaavoq.

Imm. 3. Sulisunut, tak. § 15, annerpaamik inissiat tallimanik initallit piniarneqarsinnaapput, inoqutigiinni inuit amerlassusaat § 19-imi maleruagassat malillugit naatsorsorneqarnerini sulisoq inissiamik anginerusumik ineqarnissamut pisinnaatitaanersoq apeqqutaatinnagu.

Imm. 4. Sulisitsisoq inoqutigiinni inuit amerlassusaat, taamatullu inissiamik inniminniinermut piffissaq inissiallu innersuunneqarnissaanut piffissaq pillugit ilisimatitsissuteqassaaq. Piffissami innersuussiffiusumi inoqutigiinni inuit amerlassusaat inissiap, sulisumut innersuunneqartup angissusissaanut aalajangiisuussaaq.

Imm. 5. Sulisitsisoq akisussaavoq, inoqutigiinni inuit amerlassusaat ingerlaavartumik eqqortumik nalunaarutigineqartuarnissaanut.

§ 19. Inoqutigiinni inuit amerlassusaannik kisitsinermi angajoqqaat kisimiittut aappariillu inuttut marluttut naatsorsorneqartarput. Qitornat angerlarsimaffimmi najugaqartut, inissarsiortup taassumaluunniit aappaata inooqataataluunniit pilersuisussaataaffigisai tamarmik immikkut meeqqatut ataatsit naatsorsorneqassapput. Qitornat 18-it sinnerlugit ukiullit ukiuni kingullerni marlunni inissarsiortumik ineqateqarsimagunik inoqutigiinnut ilaasutut naatsorsuutigineqassapput. Naartunerit naatsorsuineri ilanngunneqarneq ajorput.

§ 20. Sulisunut, tak. §§ 11, 12, 15, 16 aamma 17, inissiamik innersuunneqarsinnaatitaallutik atorfinitsitaasimasunut atuutissapput:

- 1) Atorfeqartoq pisussaavoq sulisunut inissiaq innersuuneqartoq tigussallugu.
- 2) Sulisoq sulisunut inissiamik innersuunneqartumik tigusiumanngitsoq inissiamik allamik innersuunneqarnissamik pisinnaatitaaffeqanngilaq.
- 3) Sulisoq sulisunut inissiamik innersuunneqartumik tigusiumanngitsoq aammalu utaqqiisaagallartumik inissinneqarsimasoq, utaqqiisaagallartumik ineqartitaanerminut ajunngitsorsiassaqaartinneqarunnaassaaq imaluunniit sulisitsisup akiligaanik inissinneqarallarnini ingerlateqqissinnaajunnaassallugu.
- 4) Sulisoq sumiginnaaneq pissutigalugu sulisunut inissiamit anisitaasoq inissiamut allamut

innersuunneqarnissamut pisinnaatitaaffeqanngilaq.

Imm. 2. Naalakkersuisut sulisorisap soqotigisaqaqatigiiffik isumaqaitgiinniarsinnaasoq ilaasortaaffigisaa isumaqatigiissuteqarfigisinnaavaa inissianik immikkut ittunik innersuussisarneq pillugu.

§ 21. Naalakkersuisut imaluunniit kommunalbestyrelse aalajangiisinnaavoq, sulisoq sulisunut inissiami najugaqartoq inissiamik attartortittakkamik nalinginnaasumik neqeroorfigineqartoq sulisunut inissiaq inissianut attartortittakkanut nalinginnaasunut atugassarititaasut malillugit tigusissaa toqqarsinnaagaa, taamaattorli tak. imm. 3. Pisinnaatitaaffik tamanna taamaallaat atuutissaaq, sulisunut inissiap initai inissiap attartortittakkap nalinginnaasup neqeroorutigineqartup initaasa amerlaqataannik amerlassuseqarpata.

Imm. 2. Imm. 1-imi taaneqartut apeqqutaatinnagit attartortup, sulisunut inissiami innersuunneqartumi ukiut arfineq marluk sinnerlugit najugaqarsimasup inissiaq inissiatut attartortittakkatut nalinginnaasutut tigusiarlugu qinnutigisinnaavaa, taamaattorli tak. imm. 4. Tamatumanili piumasaqaataavoq, sulisup piffissaq tamakkerlugu inissarsiorlutik utaqqisut allattorsimaffianni nalinginnaasumi allassimanissaa.

Imm. 3. Imm. 1-imi taaneqartut apeqqutaatinnagit attartortoq soraarninngunnginnermini ukiuni pingasuni kingullerni sulisunut inissiami ataatsimi najugaqarsimasooq inissiap attartortittakkatut nalinginnaasutut tigusissaanik qinnuteqarsinnaavoq, taamaattorli tak. imm. 4. Tamatumanili piumasaqaataavoq sulisup piffissaq tamakkerlugu inissiamut utaqqisut allattorsimaffianni nalinginnaasumi allatsissimanissaa.

Imm. 4. Imm. 1-imi, 2-mi aamma 3-mi periarfissiisutiginenartut inissianut Naalagaaffiup Sinniisoqarfiani, Nunaatta Eqqartuussiviani, Kalaallit Nunaanni Politimestereqarfik aammalu sullissiviit taakkununga atasut aqqutigalugit innersuunneqartunut, imaluunniit inissianut Naalakkersuisoqarfinni ataasiakkaani Naalakkersuisunut ilaasortanut pisortanullu, kiisalu Namminersornerullutik Oqartussat qitiusumik allaffeqarfianni immikkoortortani pisortanut assigisaannullu, akissaateqarfik 37 qaffasinnerusorluunniit naapertorlugu akissarsiaqartinneqartunut, tak. §§ 11, 14 aamma 15, kiisalu inissianut aalajangersimasumik siunertaqarluni imaluunniit atorfinnut aalajangersimasunut aalajangersimasumik atugassiilluni inniminnerneqarsimasunut atuutinngillat, tak. § 5, imm. 3.

§ 22. Kommunalbestyrelsep inunnik isumaginninnermik tunngaveqartumik ineqartitsinnermut siunertanut innersuussisinnaatitaanini atorpagu, kommunep piffissap inissiap kommunemit atorneqarsinnaalerfia aallarnerfigalugu attartortitsilernissarlu tikillugu ineqarnermut akiliutit inissiamullu atatillugu aningaasartuutit allat kommunep akilertassavai. Tamatuma peqatigisaanik saniatigut kommunep qularnaveeqqusiissutissaaq tamakkerlugu akilissavaa.

Imm. 2. Kommunalbestyrelse annaasaqaratarsinnaanermut qularnaveeqqusiissaaq, tak. § 23, attartortup inissiamut aningaasartuutitut ingerlaavartunut akiliisinnaanera attartortup attartortitsisumut uppersarsinnaanngippagu, tak. § 7.

Imm. 3. Attartortitsisup kommune inunnik isumaginninnermik tunngaveqartumik ineqartitsinissamik siunertaqarluni inissiiniarnerani itigartissinnaavaa, attartortoq siornatigut attartortitsisumut attartukkaminut akilinngitsuukkaminik ineqarnermut akiligassaqarpat imaluunniit akilersimanngisanik taarseeqqusissutininik akiligassaqarpat, taamaattorli tak. imm. 4.

Imm. 4. Attartortitsisup akerliunera atuutissanngilaq, attartortup isertinnginnerani ineqarnermut akiligassat akilinngitsuukkat taarseeqqusissutinillu akiligassat kommunep akilersimappagit.

§ 23. Annaasaqaratarsinnaanermut qularnaveeqqusiissutit attartortup ineqarnermut aningaasartuutinullu allanut inissiamut attuumassuteqartunut, taakkununga ilanngullugit iluarsaassinermut aningaasartuutitut, akiliuteqanngitsoorneratigut attartortitsisup aningaasatigut annaasaqaatigisinnaasanut sillimmatitut akilerneqassapput.

Imm. 2. Annaasaqaratarsinnaanermut qularnaveeqqusiissutit qaammatini aqqaneq-marlunni ineqarnermut akiliutit annertoqatigissavaat, taamaattorli annerpaamik 60.000 kr.-iussallutik.

Imm. 3. Annaasaqaratarsinnaanermut qularnaveeqqusiissutit inissiap attartortumut atugassiissutigineqarneraniit qaammatit aqqaneq-marluk qaangiunnerini ingerlaannartumik atorunnaassapput. Qaammatit aqqaneq-marluk iluanni attartortup sumiginnaanerata kingunerisaanik attartortitsisup attartorneq taamaatitsissavaa, kiisalu allakkatigut kommunemut nalunaarutigissallugu attartortitsisup annaasaqaratarsinnaanermut qularnaveeqqusiissutit tigusussanngorai.

Imm. 4. Attartortitsisup annaasat tamakkiisut inaarutaasumik naatsorsoreerpagit, attartortitsisup erngerluni annaasat annertussusaat kommunemut nalunaarutigissavai, taannalu tunngavigalugu kommunep qularnaveeqqusiissut akilissavaa.

§ 24. Namminersornerullutik Oqartussat imaluunniit kommunet illuutaanni attartortittakkami ataatsimi attartortut inissianik najukkaminik piginneqatigiilluni inissiatut imaluunniit inissiatut nammineq pigisatut tigusinissamik kissaateqarnertik, aammalu piginneqatigiilluni inissiaatileqatigiiffik imaluunniit inissianik nammineq pigisaqartut peqatigiiffannik pilersitsinertik pillugu attartortitsisumut allakkatigut nalunaaruteqarpata, attartortitsisup attartortoq inissiamik najukkaminik piginneqatigiilluni inissiatut imaluunniit inissiatut nammineq pigisatut tigusinissamik kissaateqanngitsoq, inissiap najugaata taamaaqataanik neqeroorfigissavaa, tak. § 5, imm. 1, nr. 2. Attartortup inissiaq neqeroorutigineqartoq tigussallugu pisussaaffiginngilaa, kisiannili tamatumunga taarsiullugu inissiami najugarisami atugassarititaasut allannguuteqartinnagit najugaqaannarsinnaavoq.

Imm. 2. Inissiap najugarisap taamaaqataanik innersuussisussaataaneq, tak. imm. 1, aatsaat atuutissaaq attartortup attartornermut isumaqatigiissut malissimappagu, aammalu attartortup inissiamik innersuunneqarnissamut piumasaqaatit allat naammassisimappagit. Pissutsinik pingaaruteqangaanngitsunik imaluunniit attartortumit iluarsineqareersimasunik attartortitsisoq pissutissarsiorsinnaatitaanngilaq.

Imm. 3. Illumi Namminersornerullutik Oqartussanit imaluunniit kommunemit pigineqartumi attartortut illumi inissiat piginneqatigiilluni inissiatut pisiariniallugit piginneqatigiilluni inissiaatileqatigiiffimmik pilersitsisimappata, piffissami piginneqatigiilluni inissiaatileqatigiiffiup illumik tigusinissamik allakkatigut neqerooruteqarneqaraniit §§ 5 aamma 65 Naalakkersuisut sanioqqussinnaavaat. Namminersornerullutik Oqartussat imaluunniit kommunep piffissaq taanna aallarnerfigalugu piginneqatigiilluni inissiaatileqatigiiffiat inummik peqatigiiffimmut ilaasortanngornissamik utaqqisut allattorsimaffianni allassimasumik inissiamut inueruttumut innersuussinissamut pisinnaatissinnaavaat.

Kapitali 3

Najugaqartut oqartussaaqataanerat

§ 25. Namminersornerullutik Oqartussat kommunellu ilaqutariinnut arlalinnut illuutaat, tassaasut illut quleriinnik initallit, illut sanileriit illullu uiguleriit ikinnerpaamik pingasunik atasunik inissiatallit,

najugaqatigiiffinnut aningaasaqarnikkut imminnut ingerlattunut agguarneqarsinnaapput.

Imm. 2. Najugaqatigiiffinni ataasiakkaani attartortut najugaqatigiiffiup § 26-mi aamma § 28, imm. 4-mi maleruagassat malillugit ingerlanneqarneranut sunniuteqaqataanissamut pisinnaatitaapput, najugaqatigiiffimmi attartortut najugaqatigiiffimmi ataatsimiititsinermi najugaqatigiiffimmi siulersuisussanik sunniuteqaqataasussanik qinersisimappata.

Imm. 3. Naalakkersuisut Namminersornerullutik Oqartussat kommunellu ilaqutariinnut arlalinnut illuutaasa najugaqatigiiffinnut agguarneqarnissaat, najugaqatigiiffinni siulersuisunut qinersisarneq najugaqatigiiffinnilu siulersuit sulinerat, matumani ilanngullugit najugaqatigiiffinni siulersuisut najugaqartunut aningaasaliissutinik atuinissaannut maleruagassat pillugit aalajangersaasinnaapput.

§ 26. Najugaqatigiiffinni tamaginni attartortitsisoq ingerlatsinermut missingersuusiussaaq, tak. § 28, imm. 2 aamma imm. 3, taannalu attartortitsisumit inaarutaasumik akuerineqannginnermini najugaqatigiiffinni siulersuisunut oqaaseqarfigisassanngorlugu saqqummiunneqassaaq.

Imm. 2. Najugaqatigiiffimmi siulersuisut ingerlatsinermut missingersuutini killiliussat iluanni makkununga tunngasunik siunnersuuteqarsinnaapput:

- 1) aserfallatsaaliugassat nutartigassallu suut attartortitsisup najugaqatigiiffimmi suliarisariaqarnerai,
- 2) najugaqatigiiffimmi init ataatsimoorussat ingerlanneqarnerat atorineqarnerallu, aamma
- 3) najugaqatigiiffimmi sunngiffimmi sammisassanik assigisaannillu pilersitsineq.

Imm. 3. Najugaqatigiiffinni tamaginni attartortitsisoq ukiumoortumik naatsorsuusiussaaq, taannalu kukkunersiorneqassaaq attartortitsisumillu inaarutaasumik akuerineqannginnermini najugaqatigiiffimmi siulersuisunut oqaaseqarfigisassanngorlugu saqqummiunneqassalluni.

Imm. 4. Ukiumoortumik naatsorsuutit attartortitsisumit inaarutaasumik akuerineqareerpata, najugaqatigiiffimmi siulersuisunut ilisimatitsissutitut nassiunneqassapput.

§ 27. Inissiaqarfinni namminersortunit pigisani imaluunniit illuutini namminersortunit pigisani, ikinnerpaamik najugaqarfusunik arfinilinnik inissiaartaqartuni, piginnittumillu ataatsimit pigineqartuni, aammalu ataatsimik amerlanerusunilluunniit ataatsimut atortulersugaasuni, soorlu kiassarneq, errorsisarfeqarneq, nalliuttorsiortarfeqarneq imaluunniit najugaqartut illuat, attartorlutik najugaqartut sinniisissaannik toqqaasinnaapput, apeqqutit illup ingerlanneqarneranut pingaarutillit tamaasa pillugit attartortitsisumut oqaloqatiginissinnaatitaasussamik.

Imm. 2. Naalakkersuisut najugaqartut sinniisissaannik qinersisarneq najugaqartullu sinniisaasa sulinerat, taassuma ataani taakku illuutini attartortittakkani namminersortuni pigisani sunniuteqaqataasinnaanerit pillugu maleruagassiorsinnaapput.

Kapitali 4

*Ineqarnermut akiliutit angissusilerneqartarnerat, ineqarnermut akiliutit iluarsiivigineqartarnerat
allaffissornikkullu aqutsineq*

Namminersornerullutik Oqartussat kommunellu inissiaataat attartortittakkat

§ 28. Namminersornerullutik Oqartussat kommunellu ilaqutariinnut arlalinnut illuutaanni najugaqatigiiffimmi inissianik attartortitsinermi isertitat tamakkiisut sukkulluunniit

annertussusilerneqarnerini, najugaqatigiiffiup aningaasartuutiniq tamanik akiliisinnaanissaa periarfissinneqassaaq, matumani ilanngullugit aningaasaaliissutinit iluanaarutinit illumik piginnittumut akiliutit aningaasartuutit, tak. § 31, aamma ingerlatsinermut atatillugu aningaasartuutit, matumani ilanngullugit allaffissornikkut aqutsinermut akiliutit, tak. § 32, imm. 1-6, aserortisarnermik pinaveersaartitsinermut akiliutit, tak. § 32, imm. 7, aamma akiliutissatut illuartitallu aalajangikkat.

Imm. 2. Ineqarnermut akiliutit ukiumoortumik attartortitsisup najugaqatigiiffummi ingerlatsinermut missingersuusiai akuerisaalu tunngavigalugit ukiumut tulliuuttumut annertussusilerneqartassapput. Imm. 1-imi piumasaqaatit naammassiniarlugit ineqarnermut akiliummik qaffaanissaq pisariaqassappat, tamanna attartortunut ataasiakkaanut qaammatinik pingasunik sioqqutsisumik nalunaaruteqareernikkut pisinnaavoq. Siumoortumik ilisimatitsissut qaffaanermut tunngaviusut qaffaatissallu qaammammut koruuninngorlugit annertussusissaat pillugit paasissutissanik imaqqanngippat siumoortumik ilisimatitsissut atortussaatinneqarsinnaanngilaq. Ukiumut tulliuuttumut missingersuutit siumoortumik ilisimatitsissumut ilanngunneqarsinnaapput, tassanilu qaffaanermut tunngaviusoq allaqqassaaq. Ineqarnermut akiliutinik appaanerit siumut ilisimatitseqqaarani pisinnaapput.

Imm. 3. Aningaasartuutit ingerlatsinermut missingersuutinit ilanngunneqarsinnaasut ilaatigut tassaasinnaapput ilanngussaq 1-imi aningaasartuutit suussusilersornissaannut assersuutigineqartut. Ilangussaq 1-imi allassimasut aningaasartuutaasinnaasut tamakkerneqanngillat.

Imm. 4. Najugaqatigiiffimmi siulersuisut immikkoortotami akuersaarnartunik annertussusilimmik pitsanngorsaanissamut nutarterinissamullu siunnersuuteqarsinnaapput, tamatuma peqatigisaanik naugaqatigiiffimmi siulersuisut ineqarnermut akiuliummut qaffaatissat pisariaqartut akuerisinnaappatigik. Naugaqatigiiffimmi siulersuisut akuersaarnartunik annertussusilimmik pitsanngorsaanissamut nutarterinissamullu siunnersuutaat najugaqatigiiffimmi ataatsimiititsisinermit akuersissutigineqassaaq.

Imm. 5. Naalakkersuisut pilersaarutaasumik aserfallatsaaliuinissamut teknikikkullu atortulersuutiniq nutarterinissamut illuartitsisarneq, ineqarnermut akiliutip naatsorsorneqartarnera aamma ineqarnermut akiliutip iluarsineqarnissaanut siumoortumik ilisimatitsisarneq pillugu maleruagassiorsinnaapput.

§ 29. Namminersornerullutik Oqartussat kommunellu ilaqutariinnut arlalinnut illuutai kingusinnerpaamik 2010-mi imermut uuttuusersorneqarsimassapput, taamaalluni illuummi imermik nillertumik kissartumillu atuinermit tamakkiisumut aningaasartuutinit naatsorsukkat immikkut atuineq malillugu attartukkanut ataasiakkaanut agguanneqarsinnaassallutik, taamaattorli tak. imm. 2.

Imm. 2. Imermut uuttuutiniq inissianut ikkussuinissamut pisussaaffik atuutissanngilaq:

- 1) ikkussuinissaq teknikip tungaanit isigalugu isumatusaarnernunngippat,
- 2) Illuutip teknikikkut atortuutiniq iluarsaassinissaq 1. januar 2011 nallertinnagu pisussatut pilersaarusiorneqarsimappat, imaluunniit
- 3) ikkussuinissaq najugaqatigiiffiup aningaasaqarneranut naleqqutinngitsumik nammakkiissappat.

Imm. 3. Illuummi teknikikkut atortulersuutiniq, tak. imm. 2, nr. 2, iluarsaassinerup peqatigisaanik immikkut imermut uuttuusersuisoqassaaq.

§ 30. Ilaqutariinnut ataatsinut illut illullu affarleriit Namminersornerullutik Oqartussanit kommunenillu pigineqartut ingerlatsinermut aserfallatsaaliuinernullu immikkoortortaqaqfinnut, aningaasaqarnikkut imminnut ingerlattunut agguarneqassapput. Kommunep ilaqutariinnut ataatsinut illut illullu affarleriit ingerlatsinermut aserfallatsaaliuinernullu immikkoortortaqaqfinnut ataatsimut amerlanerusunulluunniit

agguassavai. Ilaqutariinnut ataatsinut illut illullu affarleriit Namminersornerullutik Oqartussanit pigineqartut ingerlatsinermut aserfallatsaaliuinernullu immikkoortorta qarfimmu, Kalaallit Nunaanni ilaqtariinnut ataatsinut illunik illunillu affarleriinnit Namminersornerullutik Oqartussanit pigineqartutit tamanit peqataaffigineqartumut ataatsimoortinneqassapput, matumanili Naalakkersuisunut pisortanullu inissiat, tak. § 14, imm. 1, ingerlatsinermut aserfallatsaaliuinernullu immikkoortorta qarfimmu imminut ingerlattumut, tak. § 4, imm. 4, inissinneqartut pineqanngillat.

Imm. 2. Namminersornerullutik Oqartussat kommunellu ilaqtariinnut ataatsinut illuutaanni illuutaannilu affarleriinni ingerlatsinermut aserfallatsaaliuinernullu immikkoortorta qarfiup inissiaataanik attartortitsinermi akiliutip sukkulluunniit annertussusilerneqarnerani, ingerlatsinermut aserfallatsaaliuinernullu immikkoortorta qarfiup aningaasaliissutinit iluanaarutinut aningaasartuutinit, tak. § 31, aamma ingerlatsinermut aningaasartuutinit inissiamik piginnittumut akiliisinnaanissaa periarfissinneqassaaq, matumani ilanngullugit allaffissornikkut aqutsinermut akiliutit, tak. § 32, imm. 1-6, matumani aningaasartuutit attartortumit toqqaannartumik akilerneqartut pinnagit, tak. imm. 7.

Imm. 3. Ineqarnermut akiliutit ukiumoortumik attartortitsisup ingerlatsinermut aserfallatsaaliuinernullu immikkoortorta qarfinnut ataasiakkaanut ingerlatsinermut missingersuusaa akuerisaalu tunngavigalugit ukiumut tulluuttumut annertussusilerneqartassapput. Aningaasartuutit ingerlatsinermut missingersuutinut ilanngunneqarsinnaasut ilaatigut tassaasinnaapput aningaasartuutit ilanngussaq 2-mi sunaasinnaanerannut assersuutigineqartut. Ilangussaq 2-mi allassimasut aningaasartuutaasinnaasut tamakkerneqanngillat.

Imm. 4. Imm. 2-mi piumasaqaatit naammassiniarlugit ineqarnermut akiliummik qaffaanissaq pisariaqassappat, tamanna attartortunut ataasiakkaanut qaammatinit pingasunik sioqqutsisumik nalunaaruteqareernikkut pisinnaavoq. Siumoortumik ilisimatitsissut qaffaanermut tunngaviusut qaffaatissallu qaammammut koruuninngorlugit annertussusissaat pillugit paasissutissanik imaqqanngippat siumoortumik ilisimatitsissut atortussaatinneqarsinnaanngilaq. Ineqarnermut akiliutinik appaanerit siumut ilisimatitseqqaarani pisinnaapput.

Imm. 5. Imm. 2-4-mi aalajangersakkat apeqqutaatinnagit ingerlatsinermut aserfallatsaaliuinernullu immikkoortorta qarfimmu ineqarnermut akiliutit ilanngussaq 3-mi akinut tunngavissatut allanneqartut, aningaasaliissutinit iluanaarutinut aningaasartuutinit illumik piginnittumut akilerneqartussanik, tak. § 31, aamma allaffissornikkut aqutsinermut aningaasartuutinit, tak. § 32, imm. 1-6, ilaqartinneqartut tunngavigalugit aalajangersarneqassapput. Akinut tunngavissat ukiumoortumik Inatsisartut aningaasanut inatsisaannut oqaasertaliussinikkut allanngortinneqarsinnaapput. Akinut tunngavissanik allannguinerup imaluunniit aningaasaliissutinit iluanaarutinut allaffissornikkullu aqutsinermut aningaasartuutit, tak. §§ 31 aamma 32, imm. 1-6, qaffannerisa kingunerisaanik ineqarnermut akiliutit qaffanneqassappata, tamanna attartortunut ataasiakkaanut qaammatinit pingasunik sioqqutsisumik nalunaaruteqareernikkut pisinnaavoq. Siumoortumik ilisimatitsissut qaffaanermut tunngaviusut qaffaatissallu qaammammut koruuninngorlugit annertussusissaat pillugit paasissutissanik imaqqanngippat siumoortumik ilisimatitsissut atortussaatinneqarsinnaanngilaq. Ineqarnermut akiliutinik appaanerit siumut ilisimatitseqqaarani pisinnaapput.

Imm. 6. Attartortitsisup ingerlatsinermut aserfallatsaaliuinernullu immikkoortorta qarfimmu ineqarnermut akiliutissamik aalajangersaariaaseq allanngortissinnaavaa, attartortunut ataasiakkaanik qaammatinit pingasunik sioqqutsisumik qaammatisiutit malillugit ukiup naanissaanut atuuttussanngorlugu ilisimatitserneqarmigut. Naatsorsueriaatsip allanngortinneqarnera ineqarnermut akiliutit qaffannerinik

kinguneqassappat, siumoortumik ilisimatitsissut atorsinnaassaguni qaffaanermut tunngaviusunik qaffaatissallu qaammammut koruuninngorlugit annertussusissaannik imaqaassaaq.

Imm. 7. Eqqaavilerinermut, anartarfilerinermut, septiktankinik imaarsisarnermut, illu imermut tankeqarpat imermik pajunneqartarnermut aningaasartuutit kiisalu innaallagissamut, imermut kiassarnermullu aningaasartuutit toqqaannartumik attartortumit akilerneqartassapput.

Imm. 8. Naalakkersuisut pilersaarutaasumik aserfallatsaaliuinissamut teknikikkullu atortulersuutininut arterinissamut illuatitsisarneq, ineqarnermut akiliutip naatsorsorneqartarnera aamma ineqarnermut akiliutip iluarsivigineqartarnissanut siumoortumik ilisimatitsisarneq pillugu maleruagassiorsinnaapput.

§ 31. Ukiumoortumik Namminersornerullutik Oqartussat kommunellu aningaasaliissutinit iluanaarutissaat illutip sananeranut akiusup 1,5%-iannik annertussuseqassaaq.

Imm. 2. Illuutip sananeranut akiusup naatsorsorneqarnerani aningaasartuutit sananermut attuumassuteqartut tamarmik ilaatinneqassapput, matumani ilanngullugit pilersaarusionerq, nakkutilliineq illuliorfissamillu sanaartorfissagiuminarsaaneq. Illuutip sananeranut akiusoq, sananermut aningaasartuutiviusut apeqqutaatinnagit minnerpaamik kvadratmeterimut 7.000 kr.-inik aamma annerpaamik kvadratmeterimut 15.000 kr.-inik annertussusilerneqartassaaq.

Imm. 3. Illuummi iluarsaanneqarsimasumi iluarsaassinerup naammassinerata kingorna illuutip teknikimut aningaasaqarnermullu tunngasunik naliliiffigineqarnera tunngavigalugu sananermut akiusoq aalajangersarneqassaaq, taamaattoqli tak. imm. 2.

Imm. 4. Illuutininik pisinermi, pisinermi akiusoq illup sananeqarneratut akiusutut isigineqassaaq, kingusinnerusukkut naleqarnerulersitsisumik allanngortiterinerit, iluarsaassinerit imaluunniit pitsanngorsaanerit ilassutigalugit, taamaattoqli tak. imm. 2 aamma imm. 3. Illuutit akeqanngitsumik, tunissutitut, kingornussinikkut, taarsiissutitalimmik arsaagaanikkut imaluunniit pigisanik paarlaaseqatigiinnikkut pissarsiarineqartut sananermut akiata aalajangersarneqarnerani illuutip teknikimut aningaasaqarnermullu tunngasunik naliliiffigineqarnera tunngavigineqassaaq, taamaattoqli tak. imm. 2.

Imm. 5. Illuutip sananeqarnerani akiusoq kvadratmeterimut 7.000 kr.-inut aalajangerneqarppat, tak. imm. 2, aammalu illuummi atortulersuutinit ukunannga ataaseq amerlanerusulluunniit amigaataappata, sananermut akiusoq, tak. imm. 2, atortulersuummut amigaataasumut ataatsimut kvadratmeterimut 1.000 kr.-inik appartinneqartassaaq:

- 1) Uffarfik/anartarfik imermik kuutsitsiviusartoq.
- 2) Kiassaateqarfimmiit kiassarneqarneq /kiassaateq uuliatortoq/kiassaateq innaallagiatortut.
- 3) Innaallagiat
- 4) Imeq imaluunniit imermut tanki.
- 5) Gassi imaluunniit innaallagiat qalatsissutaasartoq.
- 6) Kiffutissat oqorsaateq, tak. imm. 6.

Imm. 6. Naternut, qilaamut iikkanullu kiffutissat mineraluldit 250 mm-it inorlugit issussuseqarpat, sananermut akiusoq ilanngaaserneqassaaq, tak. imm. 5, nr. 6. Kiffutissat allat atorneqarsimappata, kiffutissat oqorsaasinnaassusiat mineraluldi oqorsaasinnaassusianut uuttuunneqassapput.

Imm. 7. Naalakkersuisut imm. 3 aamma 4 malillugu teknikimut aningaasaqarnermullu naliliinissap qanoq ingerlanneqarnissaa pillugu maleruagassiorsinnaapput.

§ 32. Attartortitsisup attartortut allaffissornikkut aqutsinermut akiliuteqartissinnaavai, aningaasartuutitut allaffissornermut attuumassuteqartunut matusissutissanik. Allaffissornermut akiliut imm. 3-5-imi maleruagassat malillugit aalajangerneqassapput.

Imm. 2. Allaffissornikkut aqutsisussamik attartortitsisoq avataaniit atorfinitsitsinnaavoq. Avataaniit allaffissornikkut aqutsisussap akissarsiassai attartortitsisup allaffissornikkullu aqutsisup akunnerminni isumaqatigiissuteqarnerisigut aalajangerneqassapput, taakkulu attartortitsisup imm. 3-5-imi maleruagassat malillugit allaffissornikkut aqutsinermut akiliutitut attartortunit akilertissinnaavai.

Imm. 3. Allaffissornikkut aqutsinermut akiliutit attartukkanut ataasiakkaanut angeqqatigiimmik agguarlugit imaluunniit imm. 4-mi aamma 5-imi maleruagassat malillugit angissusilerneqassanersut attartortitsisup aalajangissavaa.

Imm. 4. Allaffissornikkut aqutsinermut akiliutit agguarlugit aalajangiiffigineqarsinnaapput, taamaalluni tunngaviusumik sullissinernut akiligassanut tunngaviusumik annertussusiliisoqartassalluni aammalu ilassutitut sullissinernut akiligassanut ilassutissanik annertussusiliisoqartassalluni. Tunngaviusumik sullissinermi akiliutip qularnaasavaa tunngaviusumik isumannaatsumik allaffissornikkut aqutsinerup isumagineqarnissaa.

Imm. 5. Tunngaviusumik sullissinermi akiliutissat attartornernut ataasiakkaanut angeqqatigiinnik annertussusilerlugit aalajangerneqassapput. Ilassutitut akiliutissat najugaqatigiiffinni imaluunniit ingerlatsinermut aserfallatsaaliuinemullu immikkoortorta qarfinni, attartortitsisup ilassutitut suliasatut toqqarsimasaani attartortunut akilersissavai.

Imm. 6. Naalakkersuisut Namminersornerullutik Oqartussat kommunellu inissiaataasa attartortittakkat allaffissornikkut aqunneqarnerat ingerlanneqarnerallu, matumani ilanngullugit ilaatigut allaffissornikkut aqutsinermut akiliutip immikkoortui, tunngaviusumik ilassutitullu sullissinerit immikkoortiterneri, akiliutit kiffartuussinernullu akiliutit immikkoortiterneri, aningaasaliissutinik allaffissornikkut aqutsineq, missingersuusiorneq, naatsorsuutinik saqqummiussisarneq kukkunersuinerlu pillugit maleruagassiorsinnaapput.

Imm. 7. Attartortitsisup Namminersornerullutik Oqartussat kommunellu ilaqutariinnut arlalinnut illuutaanni attartortut akiliisissinnaavai, najugaqatigiiffimmi aserorterisarnermik pinaveersaartitsinermut atatillugu aningaasartuutitut naleqquttunut matussutissanik.

Illuutit attartortittakkat namminersortunit pigineqartut

§ 33. Inissiani attartortittakkani namminersortunit pigineqartuni ineqarnermut akiliut aningaasartuutit malillugit annertussusilerneqassaaq, taannalu attartortitsisup aningaasaliissutitut aningaasartuutigisaanit uppersarnerneqartunit, ingerlatsinermut aningaasartuutigisaanit uppersarnerneqartunit aammalu illuutip teknikikkut aningaasaqarnikkullu nalingata diskontop affaatut annertussusilimmik ernialersorneqarneranut akiliutigisaanit qaffasinnerussanngilaq. Ineqarnermut akiliut inissiat angissusiat naapertorlugu agguarneqassaaq.

Imm. 2. Aningaasaliissutitut aningaasartuutit uppersarnerneqartsut tassapput illutaarnissaq siunertaralugu taarsigassarsilluni aningaasaliissuteqarnermi taarsigassarsiat erniaat imaluunniit sanatitsisup nammineq aningaasaatai atorlugit annaatarneqarsinnaanngitsunik aningaasaliissuteqarnermi erniat naatsorsukkat, aningaasaliissuteqarnermi annaasaqaratarsinnaanermut ilassuserlugit.

Imm. 3. Ingerlatsinermut aningaasartuutit uppersarsarneqartsut ilaatigut tassaapput innaallagissamut, imermut, eqqiaanermut, allaffissornikkut aqutsinermut, sillimasiinermut aserfallatsaaliuinemullu aningaasartuutit, kiisalu illuutip attartukkallu qanoq issusia eqqarsaatigalugu naapertuuttut isigineqartut malillugit teknikikkut atortulersuutininik nutarterinissamut illuartitat.

Imm. 4. Illuutip teknikikkut aningaasaqarnikkullu nalingata naatsorsorneqarnerani periaatsit Naalakkersuisunit aalajangersarneqartut malinneqassapput, tak. § 31, imm. 7.

Imm. 5. Attartortitsisoq pisinnaatitaavoq akinik qaffaanerit, akigititaasunik qaffaanerit il.il. kingunerisaannik, imaluunniit attartortitsisoq illuummi attartukkamiluunniit pitsannguisimappat ineqarnermut akiliummik qaffaanissamik piumasaqaateqassalluni. Piumasaqaat allakkatigut saqqummiunneqassaaq, tamatumunngalu peqatigitillugu illuummi attartortunut tamanut qaammatinik pingasunik sioqqutsisumik saqqummiunneqassalluni. Piumasaqaat qaffaanermut tunngaviusut qaffaatissallu annertussusissaat pillugit paasissutissanik imaqqanngippat, siumoortumik ilisimatitsissut atortussaatinneqarsinnaanngilaq.

§ 34. Attartortup ineqarnermut akiliutip qaffanneqarnissaanik piumasaqaat akueriumanngikkuniuk, tak. § 33, imm. 5, attartortup piumasaqaatip tiguneraniit kingusinnerpaamik sapaatit akunnerisa marluk qaangiunnerini akerliliissut allaganngorlugu attartortitsisumut saqqummiutissavaa, tassanilu piumasaqaammi immikkut suut akueriumaneqannginnersut allanneqassapput. Taamatut pisoqarpat attartortitsisup ineqarnermut akiliummik qaffaanissaminik piumasaqarnini aalajangiisimaannaruniuk suliaq sapaatit akunneri arfinillit qaangiutinnagit eqqartuussivinnut suliakkiissutigissavaa.

Imm. 2. Suliaq eqqartuussivinnut suliakkiissutigineqarpat, attartortitsisup ineqarnermut akiliutissatut siumoortumik nalunaarutigalugu piumasaqaatigineqartoq akilersortissavaa ineqarnermut akiliutaagallartutut eqqartuussiviup aalajangiinissaata tungaanut. Tamatuma kingorna ineqarnermut akiliut eqqartuussiviup aalajangiinera naapertorlugu iluarsiivigineqassaaq. Ineqarnermut akiliummik akiliisitsivallaartoqarsimappat, eqqartuussiviup aalajangerneraniit kingusinnerpaamik qaammatit pingasut qaangiunnerini attartortitsisup ineqarnermut akiliut iluarsiivigissavaa, piffissamit ineqarnermut akiliisitsivallaarfusup aallartinneraniit atuuttussatut naatsorsorlugu.

Imm. 3. Attartortitsisup ineqarnermut akiliisitsivallaarutinik iluarsiinera eqqartuussiviup aalajangiineraniit qaammatit pingasut sinnerlugit kingusinneruppat, attartortup ineqarnermut akiliivallaarutit ernialerneqarnissaat piumasarisinnaavaa, piffissamit ineqarnermut akiliisitsivallaarfusup aallartinneraniit atuuttussatut naatsorsorlugu. Kingusinaarluni akiliinermi il.il. ernialersuisarneq pillugu inatsimmi maleruagassat naapertorlugit erniat naatsorsorneqassapput.

§ 35. Illuutini illuniluunniit pisortanit imaluunniit namminersortunit pigineqartuni ineeqqanik najugaqarfissanik inuinnarnut attartortitsinermi, ineqarnermut akiliutit annerpaamik inissiami ineqarnermut imaluunniit akilersuutininik akiliutininik, kiassarnermut, innaallagissamut, imermut il.il. aningaasartuutaasunut, ineeqqat amerlassusaannut naatsorsorneqartunut naapertuuttumik annertussusilerneqassapput.

Imm. 2. Ineeqqani attartortitsisup nammineq najugaata ilaanniittuni attartornermut akiliutit qaffanneqarnissaat qaammammik ataatsimut sioqqutsisumik ilisimatitsissuteqareernikkut pisassapput. Ineeqqanut allanut tunngatillugu qaammatinik pingasunik sioqqutsisumik ilisimatitsisoqartassaaq. Siumoortumik ilisimatitsissut allaganngorlugu saqqummiunneqassaaq.

Ataatsimut aalajangersakkat

§ 36. §§ 30-35-mi maleruagassat attartortumut ajoqutaasumik isumaqatigiissuteqarnikkut sanioqqunneqarsinnaanngillat.

Kapitali 5

Qularnaveeqqusiissummik ineqarnermullu akiliummik akiliisarneq

§ 37. Attartornerup aallartinnerani Namminersornerullutik Oqartussat kommunellu inissiaataanni attartortittakkani attartortut qularnaveeqqusiissut, qaammatini pingasuni ineqarnermut akiliutissap annertoqataanik annertussusilerneqartoq attartortitsisumut tamakkerlugu akilissavaat. Attartortup attartornerup aallartinnerani qularnaveeqqusiissutissaq tamakkerlugu akilersinnaanngikkuniuk, attartortup akiligassaq qaammatinut aqaaneq-marlunnut angeqqatigiinnut aggorlugu qaammatikkaartumik akilersorsinnaavaa, tak. imm. 7.

Imm. 2. Akilersuinissamik isumaqatigiissuteqarnermi, tak. imm. 1, attartortoq isumaqatigiissutit pilersinneqarneranut akiliutitut 500 kr.-inik sullissinermut akiliisinneqassaaq, piffissallu akilersuiffusup ingerlanerani qaammatit tamaasa 50 kr.-inik sullissinermut akiliisinneqartassalluni, taamaattorli tak. imm. 3. Attartortitsisup akileeqqusinermut sullissinermut akiliutitut 50 kr.-inik, taassumalu saniatigut akiitsut 1.000 kr.-it sinnerlugit amerlassuseqartut 2%-iinik akiliinissaq piumasarisinnaavaa, taamaattorli tak. imm. 3. Aningaasat koruuninut ilivitsunut qaninnernut ikilineqassapput. Sullissinermut akiliut attartortitsisumut tutsinneqartassaaq.

Imm. 3. Sullissinermi akiliutissanik akiilisitsiniartarneq, tak. imm. 2, inissarsiortunut, inoqutigiinni inissarsiortuni ukiumut isertitat akileraarutaasussat piffissami pineqartumi naatsorsorneqartut inissiani attartortittakkani ineqarnermut tapiissuteqartarneq pillugu Inatsisartut peqqussutaat nalunaarutillu tassunga attuumassuteqartut sukkulluunniit atuutsinneqartut naapertorlugit ineqarnermut tapiiffigineqarnissamut killissarititaasut inorlugit amerlassuseqarpata atuutsinneqassanngilaq.

Imm. 4. Eqqunngitsunik paasissutissiinerup kingunerisaanik qularnaveeqqusiissutigineqartussat tamakkerlutik ataatsikkut akiligassanngortinneqarsinnaapput.

Imm. 5. Attartortup attartukkaminik qimatsineranut atatillugu attartortitsisup qularnaveeqqusiissut immikkullu qularnaveeqqusiissut, tak. § 50, imm. 5, attartortumut piumasaqaatinut matusissutissatut atorsinnaavai.

Imm. 6. Naafferartumik akilersuinissamik isumaqatigiissuteqarsinnaatitaaneq attartortunut ukiut pingasut kingulliit iluanni attartorsimasaminni inigisamut aningaasartuutinut ingerlaavartunut akiliinngitsoortarnikkut sumiginnaasimasunut atuutinngilaq.

Imm. 7. Naalakkersuisut qularnaveeqqusiissuteqartarneq pillugu maleruagassiorsinnaapput.

§ 38. Attartortoq pisussaavoq ineqarnermut, imermut kiassarnermullu akiligassanik, attartornermut isumaqatigiissummi aalajangersarneqartumi akiliinissamut piffissaq eqqorlugu akiliisassalluni.

Imm. 2. Attartortitsisoq akiliiffissamik akileeriaasissamillu innersuussissaaq. Akiligassat, tak. imm. 1, kingusinnerpaamik akiliiffissap kingulliup qaangiunnerata kingorna ulluinnaat pingajuanni akilerneqarsimassapput. Ulloq taanna arfininngorneruppat, nalliuttuuppat imaluunniit Inuiaat

Ullorippassuk ulluinnarmi tullermi akiliinissaq piffissaq eqqorlugu akiliinerussaaq. Aningaaserivikkut akiliineq akiliiffissatut innersuunneqartumut akiliinertut isigineqassaaq. Akiliiffissamik innersuussisoqarsimanngippat ineqarnermut akiliut attartortitsisup niuerneramik ingerlataqarfianut imaluunniit attartortitsisoq avataaniit aqutsisumik atuippat, taassuma niuernikkut ingerlataqarfianut akilerneqassaaq.

§ 39. Attartornermik taamaatitsitsinermi imaluunniit piffissami aalajangersimasumi attartortitsinerup naanerani attartortoq pisussaavoq, attartornerup attartornissamik isumaqatigiissut naapertorlugu naanissaata tungaanut piffissaq eqqorlugu ineqarnermut akiliissassalluni, tak. §§ 70 aamma 71.

§ 40. Inissianik namminersortunit pigineqartunik attartortitsinermi qularnaveeqqusiissutit siumoortumillu ineqarnermut akiliutit qaammatini arfinilinni attartornerup nalinga sinnerlugu amerlassuseqassanngillat. *Imm. 2.* Imm. 1 attartortumut ajoqutaasumik sanioqqunneqarsinnaanngilaq.

Kapitali 6

Imermut, kiassarnermut il.il. akiliisarneq

§ 41. Attartortitsisoq kiassarnermik imermillu kissartumik attartortumut pilersuisuuguni, attartortitsisup attartortup kiassarnermut imermullu kissartumut atugaanut aningaasartuutini, kiisalu attartortup inini ataatsimoorfusuni assigisaanniluunniit kiassarnermut imermullu aningaasartuutitut akileeqataassutissai attartortumut akiligassiissutigisinnavai. Tamakkununga aningaasartuutit ineqarnermut akiliummut ilaatinneqarsinnaanngillat, ukiumoortumilli kiassarnermut naatsorsuutit immikkut ittut, attartortitsisup suliarineqartut aqqutigalugit akilerneqassallutik. Ukiumoortumik kiassarnermut naatsorsuuteqarfiusumi qaammatisiutit ukiuat malinneqassaaq.

Imm. 2. Attartortup aningaasartuutitut akileeqataasutissatut matusissutissaannut attartortoq qaammatikkaartumik akiliutaagallartunik akiliisinneqartassaaq. Attartortup akiligassaa attartornermini akiligassatut pisussaaffuvoq, aammalu ineqarnermut akiliummut ilanngullugu akiligassiissutigineqartassalluni, tak. § 38.

Imm. 3. Attartortitsisoq kiassarnermut naatsorsuusiorderminut atatillugu allaffissornikkut aqutsinermut akiligassanik akiliisitsisinnaavoq.

Imm. 4. Naalakkersuisut kiassarnermut naatsorsuusiorderneq, aningaasartuutit attartortunut agguarneqartarnerat, akiliisarneq aamma kiassarnermut akiliutissat iluarsivigineqartarnerat pillugit maleruagassiorsinnaapput.

§ 42. Attartortitsisup illuummi ukiumi kiassarnermut naatsorsuuteqarfiusumi kiassarnermut imermillu kissartumik pilersuinermut aningaasartuutit pillugit kiassarnermut naatsorsuutit, sumiiffimmut attartortitsisup nammineeeluni toqqagaanut kingusinnerpaamik apriliip ulluisa 30-anni saqqummiutissavai.

Imm. 2. Ulloq imm. 1-imi aalajangerneqartoq taanna nallertinnagu naatsorsuutit saqqummiunneqanngippata, attartortitsisup akiliutaagallartut saniatigut akiligassanik akiliisitsiniarsinnaatitaanini annaassavaa.

Imm. 3. Naatsorsuutit kingusinnerpaamik juunip ulluisa 30-anni saqqummiunneqanngippata, attartortup

naatsorsuutit inaarutaasut malillugit pisassami akilerneqarnissaasa tungaanut, Kalaallit Nunaanni aningaaserivimmi uninngasuutinut erniat sukkulluunniit qaffasinnerpaatinneqartut annertoqataannik ernialersussallugit pisinnaatitaavoq. Attartortup pisassaasa ernialersorneqarnerat aallarissaaq juunip ulluisa 15-anni, attartortup pisassaqarnera ulloq taanna allakkatigut attartortumut nalunaarutip nassiunneqartussaaffia aallarnerfigalugu.

Imm. 4. Kingusinnerpaamik juunip ulluisa 15-anni akileriikkat saniatigut akiligassat imaluunniit utertitassat pillugit allakkatigut nalunaarutit attartortumut nassiunneqarsimassapput. Nalunaarut attartortup imm. 6 naapertorlugu akerylisiinnaanera pillugu paasissutissanik imaqassaaq.

Imm. 5. Imm. 4 naapertorlugu allakkatigut nalunaarut kingusinnerpaamik juunip ulluisa 15-anni nassiunneqarsimangippat, attartortoq akiligassat saniatigut akiliisinniarneqarsinnaanngilaq.

Imm. 6. Attartortup naatsorsuutinut akeryliliissutaa allakkatigut attartortitsisumut saqqummiunneqassaaq, kingusinnerpaamillu aggustip ulluisa aallaqqaataanni attartortumut nassiunneqarsimassalluni. Akeryliliissut naatsorsuutini immikkoortut suut akuerineqannginnersut pillugit paasissutissanik imaqassaaq.

§ 43. § 42, imm. 4-mi piffissarititaasup naanerani avataanit pilersuisunit kiassarnermut naatsorsuutinut naammassisunut akiligassanik siumut naatsorsuutigeriinngisanik tigusaqartoqarpat, attartortitsisup akiligassat immikkut ittumik iliuuseqarluni kiassarnermut naatsorsuutinut tulliuuttunut nuussinnaavai. Attartortitsisoq akiligassat nuunneqartut annertussusiat pillugu attartortunut ilisimatitsissuteqassaaq.

Imm. 2. Aningaasartuutit attartortut akornanni kukkusumik agguarneqarsimappata, attartortitsisup kukkuneq erngerluni iluarsissavaa, tamannalu pillugu attartortunut kalluarneqartunut allakkatigut ilisimatitsissuteqassalluni, tak. imm. 3 aamma 4.

Imm. 3. Attartortoq akiligassiissutaagallartunut akiliinikipallaarsimappat, attartortitsisoq akiligassanut ilassutissanik siusinnerpaamik attartornermut akiliutinik akiliiffissami siullermi, imm. 2 naapertorlugu qaammammi attartortup nalunaarummik tigusaqarfianut tulliuuttumi akiliisoqarnissaanik piumasaqarsinnaavoq. Ilassutissatulli akiligassat qaammatini pingasuni kiassarnermut siumoortumik akiliutaagallartunit amerlaneruppata, attartortoq pisinnaatitaavoq akiligassat qaammatikkaartumik akiligassatut pingasunut annertoqatigiinnik annertussusilerlugit agguarlugit akilissallugit.

Imm. 4. Attartortoq akiligassiissutaagallartunut akiliivallaarsimappat, imm. 2 naapertorlugu nalunaaruteqarnerup kingorna akiliivallaarutit attartortumut aningaasanngorlugit akilerneqassapput, imaluunniit attartornermut akiligassanit siullernit ilanngaatineqassallutik.

Imm. 5. §§ 41 - 43-mi maleruagassat attartortumut ajoqutaasumik isumaqatigiissuteqarnikkut sanioqqunneqarsinnaanngillat.

§ 44. Pilersuinerimik ingerlatseqatigiiffusooq illuatungeriit isumaqatigiissuteqarnerat tunngavigalugu attartortunut imermik pilersuisuuppat, akileeqqusissut akilikallu pilersuinerimik ingerlatseqatigiiffusup attartortullu akornanni toqqaannartumik naammassineqassapput. Akileeqqusissutit akilikallu pilersuinerimik ingerlatseqatigiiffusup piumasaqaatai nalinginnaasut naapertorlugit ingerlanneqassapput.

Imm. 2. Attartortitsisoq attartortumut imermik pilersuisuuppat, attartortitsisoq tamatumunnga aningaasartuutini matussusertinniarlugit piumasaqarsinnaavoq. Attartortitsisup attartortoq attartortitsisup imermut aningaasartuutaanut matusissutissanik akiliutaagallartussanik akileeqqussavaa. Akiliutaagallartussat qaammammut ataasiarluni immikkoortillugit ineqarnermut akiliutissat

nassiunneqarnerinut ilanngullugit akilersinniarneqartassapput.

Imm. 3. Illuummi inissiat immikkut naatsorsuineranut uuttuusersugaanngippata, illummi imeq atorneqartoq tamakkiisoq attartukkat ataasiakkaat angissusaat naapertorlugu agguarneqassaaq. Imermut naatsorsuusiormi attartortitsisoq attartukkamut ataatsimut akiliisitsisinnaavoq, akiliutissarluk 275 kr.-init annertunerussanngilaq. Imermut naatsorsuutit najugaqatigiiffimmi illuutip inissisimaffigisaani ukioq naatsorsuusiormiusoq malissavaat.

Imm. 4. Illuummi attartukkat ataasiakkaat immikkut naatsorsuineranut uuttuusersugaappata, uuttuutit ataasiakkaat aningaasartuutitut matussusiissutissanik akiliisitsiniarnissaq imaluunniit akiliutaagallartunut akiliivallaarutit utertitsinissaq siunertarlugu ukiumut ataasiarlutik atuarneqartassapput. Tamannattaq attartortup inissiamut iserterneranut aamma inissiamit anineranut atuutinneqarpoq. Akiligassani attartortumut nassiunneqartuni ilaatinneqartussat tassaapput piffissami imermut uuttuut malillugu imermik atuinerup annertussuserpiaa 5 %-inik ilaqartinneqartoq, atuaanermut akiliut 175 kr.-init annertunerutinneqartussaanngitsoq, kiisalu uuttuummik attartorneq uuttuummut ataatsimut qaammammut 10 kr.-inik annertussusilerneqartoq.

Imm. 5. Attartortup attartortitsisumut isumaqatigiissuteqareeragut nammineerluni imermut uuttuumik atuaalluni tamatuma inerneranik attartortitsisumut nalunaaruteqartarpat, attartortoq atuaanermut akiliummik 50 kr.-it sinnernagit annertussuseqartumik akiliisinneqartassaaq. Akiliutaagallartunut akiliivallaarutit attartortumut utertinneqartassapput, aammalu akiliutaagallartunut akiliinikipallaarutit attartortumut ilassutitut akiligassanngortinneqartassapput. Ilassutitut akiligassat qaammattini pingasuni imermut akiliutaagallartunit annertuneruppata, attartortoq pisinnaatigaavoq akiligassat qaammattikkaartumik akiligassatut annertoqatigiinnut pingasunut agguarlugit akilersussallugit.

Imm. 6. Naalakkersuisut atuaasarneq imermullu atukkamut akiliisitsisarneq, kiisalu imermut naatsorsuusiortarneq pillugu sukumiisunik maleruagassiorsinnaapput.

Kapitali 7

Aserfallatsaaliuineq, iluarsaassineq atuinerlu

§ 45. Namminersornerullutik Oqartussat kommuunillu inissiaataanni attartortittakkani illuutit attartortitallu isumannaatsumik aserfallatsaaliorneqarnissaasa isumagineqarnissaa attartortitsisup pisussaaffigaa.

Imm. 2. Avammut kuuffinnut, kiassarnermut, innaallagissamut, gassimut imermullu teknikikkut atortulersuutit tamarmik pitsaasuutinneqassapput atorsinnaasuutinneqassallutillu. Taamatuttaaq innaallagissamut ikkuffiit, iikiussat, matserfiit, kiassaait, ruujorit, sikaaviit alaakkaasut, illup iluani atortut il.il. aserfallatsaalissallugit attartortitsisup pisussaaffigai. Nungullarnikkut pisoqalinikkullu ajorseriaatsit kingunerisaannik ima akulikitsigisumik isumagineqartassapput nutarterinerit iluarsaassinerillu illuutit attartorneqartullu pissusissaat eqqarsaatigalugit pisariaqartitsinerit malillugit suliarineqartassallutik.

Imm. 3. Piffissami attartorfusumi attartortup inissiami qilaat qalipallugit qaqorsarnissaat, iikkat qalipannissaat aamma/imaluunniit ungalitsersorneqarnissaat kiisalu natit lakkernissaat akisussaaffigaa taakkunungaluk aningaasartuutit akilissallugit.

§ 46. Inuinaat inissianik attartortitsineranni attartortoq attartortitsisorlu allanik isumaqatigiissuteqarsimanngippata § 45-mi allassimasut atorneqassapput.

§ 47. Attartortitsisup attartorneqartoq piffissamit attartornissap aallartiffissaaniit pitsaasumik isumannaatasumillu pitsaassuseqartillugu attartortumut atugassanngortissavaa. likkat, qilaat naqqillu nalinginnaasumik iluarsaanneqarsimassapput, tak. § 77, imm. 1. Attartugassaq eqqiarneqarsimassaaq uumasuaqaassananilu, igalaat, sikaaviit matui aamma matut ilivitsuussapput atorsinnaasunillu paarnaarsaateqassallutik. Kiisalu matut silarliit tamarmik immikkut marlunnik matuersaateqassapput, teknikikkullu atortulersuutit ajoquteqassanatik.

Imm. 2. Inissiamut iserternissamut atatillugu attartortitsisup attartortoq taannaluunniit sinnerlugu takkuttoo ilagalugu inissiaq takuniassavaat inissiamullu iserternermut nalunaarusiussallutik, taassumalu assilineranik attartortoq tunineqassaaq, taamaattorli tak. imm. 5. Takuniaanermi amigaatit malugineqartut inissiamut iserternermut nalunaarusiamut ilanngunneqassapput.

Imm. 3. Amigaatit allat, attartortup inissiamut iserternermi kingorna tigusinermut atatillugu tikkuarsutai inissiamut iserternermiit sapaatit akunneri marluk qaangiutsinnagit allakkatigut attartortitsisumut nalunaarutigineqassapput. Amigaatilli nalinginnaasumik misissuinermi takuneqarsinnaasimanngippata imaluunniit attartortitsisoq peqquserlussimappat tamanna atuutissanngilaq.

Imm. 4. Imm. 2-mi aamma 3-mi maleruagassat attartortumut ajoqutaasumik isumaqatigiissuteqarnikkut sanioqqunneqarsinnaanngillat.

Imm. 5. Inissiamut iserternissamut atatillugu misissuinissamut aningaasartuutissat annertuallaarpata, inissiamut iserternissamut atatillugu takuniaaneq pinngitsoorneqarsinnaavoq.

§ 48. Attartortup attartorneqartoq isumannaatsumik paarissavaa, ajoqusikkanullu attartortup nammineq, attartortup inoqutaasa allalluunniit attartortup attartorneqartumut isersinnaatitaasa isumannangitsumik pissusilersornerisigut ajoqusersimasaannut taarsiinissamut attartortoq akisussaavoq. Takusaanermi paarsinerluttoqarsimasooq paasineqarpat, attartortitsisup tamanna piumasarippagu attartortup ingerlaannartumik ajoqusikkat iluarsaatissavai.

Imm. 2. Attartortup attartortitsisoq akuersiseqqaarnagu inissiaq isumaqatigiissutigineqartumit allaanerusumik atussanngilaa.

Imm. 3. Inissiami ineeqqanik ataasiakkaanik inisimasunut allanut attartortitsinerup saniatigut, attartortup attartortitsisoq akuersiseqqaarnagu inoqutigisami saniatigut allanut attartorneqartoq atugassanngortissanngilaa, taamaattorli tak. § 58.

Imm. 4. Ineeqqanik attartortut attartortitsisoq akuersiteqqaarnagu ineeqamik atuinernik allanut tunniussinnaanngilaat.

Imm. 5. Attartortup attartortitsisoq pisariaqartinneqartumik isumaqatigiissuteqarfigeqqaartinnagu inissiaq piffissaanngitsukkut qimassanngilaa.

§ 49. Attartortup pissutissaqavinngikkuni attartortitsisoq inissiamik inatsisinik unioqqutitsilluni atuisoqarnerisooq imaluunniit aserfallatsaaliinerup qanoq issusianik paasiniaalluni, iluarsaassisoqassatillugu imaluunniit allanut attartortitsisoqassatillugu inissiamik misissuiniarpat inissiamut isernissaanik itigartissinnaanngilaa.

Imm. 2. Attartortitsisoq sapaatit akunnerinik arfinilinnik siumut ilisimatitsereernermigut attartukkami suliassanik aallartitsisinnaavoq, suliat ingerlanneqarnissaat attartortumut annertuumik akornutaassanngippata. Sulianik allanik aallartitsisoqartinnagu attartortoq qaammatinik pingasunik

siumut ilisimatitserertussaavoq. Taamaattorli attartortitsisoq tamatigut suliassanik kinguartinneqarsinnaanngitsunik siumut ilisimatitseqqaarani iluarsaassinnaavoq.

Imm. 3. Suliat suugaluartulluunniit attartortitsisumit aallartinneqartut unitsinneqaratik attartortumullu sapinngisamik annertunerpaamik mianerinnilluni suliarineqartassapput. Attartortitsisoq ingerlaannartumik suliat malitsigisaanik iluarsaassissaaq.

§ 50. Attartortup taassumalu inoqutaasa kiisalu inuit attartortumit attartorneqartumut isersinnaatitaasut illumi torersaarnissamut maleruagassat, ilanngussaq 4-mi taaneqartut maleruassavaat.

Imm. 2. Najugaqatigiiffimmi siulersuisut torersaarnissamut maleruagassanut ilassutaasunik aalajangersaasinnaapput, taakkulu attartortitsisumit akueringeqarnerminni atuutsinneqalissapput.

Imm. 3. Namminersornerullutik Oqartussat kommunellu inissiaataanni attartortittakkani attartortitsisoq allakkatigut akuersissuteqarsimatinagu inissiami uumasuuteqartoqaqqusaanngilaq. Taamaattorli aalisakkat aalisagaasivimmiittut, timmisat ineqartinneqartut, kikkaasut ineqartinneqartut, kiisalu saaniluit akuersissuteqarnissamut piumasaqarfussanngillat. Uumasuuteqarnissamut akuersissuteqarnermi attartortitsisup qaammatini pingasuni ineqarnermut akiliutip annertoqataanik immikkut sillimanissamut akiliuteqarnissaq piumasarinnaavaa. Attartortup peqqussutip matuma atuutilernissaata tungaanut maleruagassat malillugit uumasuuteqarsimasut, uumasuutigisap maleruagassat malillugit uummasuutigineqartup pigisaqaannarnissamut pisinnaatitaapput.

Imm. 4. Attartortup akuersissutip tunniunneqarneranut atatillugu sillimmasiinissamut akiliutissaq aningaasanngorlugu akilissavaa.

Imm. 5. Attartukkap qimanneranut atatillugu uumasuuteqarnerup kingunerisaanik ajoquserneqartut iluarsaannerinut attartortitsisup sillimmasiissutit atorsinnaavai.

Kapitali 8

Attartortup attartukkamik atuisinnaanerani piginnaatitaaffi

§ 51. Namminersornerullutik Oqartussat imaluunniit kommunet inissiaataanni attartortittakkani attartortoq siumoortumik attartortitsisoq akuersiteqqaarlugi nammineq akilikkaminik attartukkami atortulersuutinik nalinginnaasunik ikkussuinissamut pisinnaatitaavoq, tamatumani attartortitsisup illuutit innaallagissamut kuuffinnullu atortuisa pisinnaasai atortulersuutitut naammangitsut qularnaarsimangippagu.

Imm. 2. Attartortitsisoq piumasaqarsinnaavoq attartortoq inissiamit nuunnermini iluarseeqqissasoq imaluunniit atortulersuutit attartortitsisumit tiguneqassasut.

Imm. 3. Attartortitsisoq piumasaqarsinnaavoq attartortoq atortulersuusersuinerup iluarseeqqinnissaanut sillimmatissatut naammaginnartunik annertussusilinnik qularnaveeqqusiissasoq.

§ 52. Namminersornerullutik Oqartussat kommunellu inissiaataanni attartortittakkani attartortut kommunemi najukkamilu pilersaarutit ataqqillugit ataasiakkaarlutik imaluunniit ataatsimoorlutik illumi attartortitsisup innersuussineratigut radiop TV-llu aallakaatitaannik tigooqqaanissamut radiomut fjernsynimulluunniit antenniliisinnaatitaapput, taamaattorli tak. imm. 2. Taamatuttaaq attartortut illumi radiup TV-llu aallakaatitaannik isiginnaarnissamut kabelikkut attaviliisinnaatitaapput, najugaqarfimmi TV-mut kabelinut attaviliinissaq periarfissaqarpat.

Imm. 2. Imm. 1 malillugu attartortut pisinnaatitaaffiat atuutissanngilaq, ikkussineq illumut najugaqartuinullu allanut akornutaassasoq attartortitsisup uppersarsinnaappagu. Kiisalu pisinnaatitaaneq atuutissanngilaq attartortitsisup ataatsimoorussamik TV-kkut isiginnaagassanik pilersuina aqutigalugu imaluunniit attartortut arlaata antenniliussaa ataatsimoorussaasinnaasoq aqutigalugu attartortut kissaatigisaminnik isiginnaarsinnaappata.

Imm. 3. Attartortut illumi antenneliinnginneranni attartortitsisoq taamaaliornissamut allakkatigut akuersissuteqassaaq, attartortitsisullu tassunga atatillugu piumasarisinnaavaa attartortut allanut nuuttoqarnerani pissusaatut pilersitseqqissasut aamma attartortut atortut peerneqareerpata illumik pissusaatut pilersitseqqinnissamut qulakkeerutaasunik naammaginatunik qularnaveeqqutissanik akiliissasut.

Imm. 4. Immikkut imaluunniit ataatsimut antenniliussat, tak. imm. 1, ingerlanneqarnerat attartortitsisumit susassarineqanngilaq.

§ 53. Namminersornerullutik Oqartussat inissiaataanni attartortittakkami attartortoq attartortitsisoq siumut allakkatigut akuersissuteqarteqqaarlugu inunnik isumaginninnermi inatsisini aalajangersakkat malillugit iluaqusersuutini ikkussuinnaatitaavoq. Attartortitsisup attartortoq attartukkaminik qimatsinermini inissiap pissusiatut pilersitseqqinnissaa aamma kommunalbestyrelsi inissiap pissusaatut pilersitseqqinnermut aningaasartuutit akilerneqarnissaannut qularnaveeqqusinissaa piumasaqaatigisinnaavaa. Attartortup attartortitsisoq iluaqusersuutit ikkussuunneqannginneranni kingusinnerpaamik sapaatit akunnerinik arfinilinnik sioqqutsilluni ilisimatitsissuteqarfigissavaa.

§ 54. Namminersornerullutik Oqartussat kommunelluunniit inissiaataanni attartortittakkami attartortoq ajoqusikkanut, attartortut ataasiakkaat §§ 51 aamma 52 malillugit ikkussuussimasaannik pissuteqartunut taarsiinissamut akisussaavoq.

Imm. 2. Attartortup taarsiisussaataanera iluarseeqqinnermi imaluunniit attartortitsisup atortulersuutini tigusinerani atorunnaassaaq.

§ 55. Namminersornerullutik Oqartussat kommunelluunniit inissiaataanni attartortittakkami attartortoq attartortitsisumit siumut allaganngorlugu akuersissummik peqqaarluni inissiami silataanilu erseqqissumik aalajangikkanik pitsanngorsaasinnaatitaavoq il.il., inissiamiillu nuunnermini aningaasartuutigisimasani uppersaaserneqartut aningaasanngorlugit taarsertinnissaannut pisinnaatitaalluni, tak. §§ 56 aamma 57.

Imm. 2. Attartortoq attartortitsisumit akuerineqarani attartukkamik allannortiterisimappat, attartortoq attartortitsisumut tamanna pillugu taarsiisuteqarnissamut akisussaatinneqassaaq.

§ 56. Ajunngitsorsiassat attartortup inissiamik qimatsinerani attartortitsisumit akilerneqassapput. Attartortitsisoq attartortup ajunngitsorsiassaanik attartortup attartortitsisumut pisussaaffinit ilanngaassisinnaavoq. Ajunngitsorsiassat attartortup pitsanngorsaaneraniit qaammatit 100-t ingerlaneranni assigiimmik annertussusilinnik agguakkamik nalikilliartuaartinneqassapput.

Imm. 2. Attartortumik nutaamik inissiamut, attartortup siulliup pitsanngorsaavigisimasaanut il.il. nuuttoqartillugu, attartortitsisup ajunngitsorsiassatut aningaasartuutigisimasani matussutissiiviginiarlugit

ineqarnermut akiliut qaffaassavaa. Akiliutip qaffaataa unitsinneqassaaq nalikillisitsiartuaarneq naammassippat, tak. imm. 1.

§ 57. Naalakkersuisut attartortup pitsanngorsaavigisinnaasai suliarisinnaasaalu allat, naatsorsuisarneq ajunngitsorsiassanullu akiliisarneq pillugu sukumiinerusunik maleruagassiorsinnaapput.

Imm. 2. Attartortitsisoq §§ 51 aamma 55 naapertorlugit qinnuteqaatinik suliarinninnerminut sullissinermut akiliuteqartoqarnissaanik piumasaqarsinnaavoq. Naalakkersuisuniit sullissinermut akiliutip annertussusissaa aalajangerneqassaaq. Sullissinermut akiliutissaq qinnuteqaatip tunniunneqarnerani akilerneqassaaq.

Kapitali 9

Atuisinnaatitaanerup allamut nuunneqarnera

§ 58. Attartortup attartornissamik isumaqatigiissut maleruarsimaguniuk, attartortoq inigisaminik qimatsisimagallarnerni inigisaminik qaammatit aqqaneq-marluk tikillugit allamut attartortitsigallarnissamut pisinnaatitaavoq. Allamut attartortitsigallarneq qaammatinit pingasunit sivikinnerutinneqarsinnaanngilaq. Attartortup inigisaminik allamut attartortitsigallarnera ukiut tallimat ingerlanerini taamaallaat katillugit qaammatini aqqaneq-marlunni pisinnaavoq, taamaattorli tak. imm. 2.

Imm. 2. Imm. 1-imi piffissamut killiliussaq apeqqutaatinagu attartortup inigisaminik allamut attartortitsigallarnissaq qinnutigisinnaavaa, attartortup peqannginnissaa peqanngikkallarnerusimappat, aammalu nappaammik, ilinniagaqarnermik, pineqaatissinneqarsimasunut inissiisarfimmiinnermik imaluunniit attartortoq nammineerluni imaluunniit inoqutaasa ilaat nuukkallartitaanerani tamanna pissuteqarpat. Allamut attartortitsigallarneq qaammatinit pingasunit sivikinnerutinneqarsinnaanngilaq.

Imm. 3. Attartortitsisup allamut attartortitsigallarnissaq akueriumanngissinnaavaa,

1) inissiaq innersuunneqarsimappat, tak. § 5, imm. 1, nr. 7,

2) inissiami ineqartussat katillutik ininit amerlanerusussaassappata, imaluunniit

3) attartortitsisoq allamut attartortitsigallarnissamut akierliunissamut naammaginartunik pissutissaqarpat.

Imm. 4. Namminersornerullutik Oqartussat kommuunillu inissiaataanni attartortittakkani najugaqartut inigisaminnik allamut attartortitsigallarnissamut taarsiullugu pisinnaatitaapput, piffissap peqarfiginngisassamik naanerani inissiamut allamut innersuunneqarnissamut qularnaveeqqusiivigineqarsinnaagunik attartornerminnik unitsitsinissamut, tak. § 5, imm. 1, nr. 3.

Imm. 5. Allamut attartortitsigallarnissap akuerineqarnissanut piumasaqaataavoq, ineqarnermut akiligassap annerpaamik attartortup ineqarnermut, kiassarnermut, innaallagissamut, imermut il.il.

anigaasartuutigisartagaasa amerlaqataannik annertussuseqarnissaa. Immikkut ittunik pissutissaqartillugu, soorlu pequtit attartorallarnermut ilaatinneqassappata akiliutissaq anginerutinneqarsinnaavoq. Attartorallakkamik attartorallartoq attartortitsisumut toqqaannartumik ineqarnermut akiliutissamik akiliisassaaq.

Imm. 6. Attartortoq pisinnaatitaavoq attartukkaminik utoqqiisaasumik allamit attartorallartumit qularnaveeqqusiissummik akiliisitsissalluni, attartukkamik utaqqiisaasumik attartorallartinneqartup attartortup pisussaaffinut sillimmatissanik. Qularnaveeqqusiissut aamma inissiamik attartornermut siumoortumik akiliutit katillugit annerpaamik qaammatini arfnilinni attartornermut akiliutit amerlaqatigissavaat.

Imm. 7. Attartortitsisup attartukkamik attartorallarneq § 75-imi maleruagassat malillugit taamaatitsissinnaavaa.

Imm. 8. Naalakkersuisut attartukkamik attartortitsigallarneq ineqarnermullu qularnaveeqqusiissut pillugit maleruagassiorsinnaapput.

§ 59. Namminersornerullutik Oqartussat kommunelluunniit inissiaataanni attartortittakkani attartortut nammineq kissaatigalugu nuunnissamut allattuiffimmut allatsissinnaapput.

Imm. 2. Attartortut iniminnik paarlaateqatigiinnissartik namminneerlutik isumaqatigiissutigisimappassuk, tamanna nuunnissamik kissaateqartut allattorsimaffiannut allatsinngikkaluarluni pisinnaavoq.

Imm. 3. Attartortut iniminnik paarlaateqatigiinnissamut kissaateqartut tamarmik attartornermut isumaqatigiissutinik maleruaasimanissaat piumasaqaataavoq. Inigisanik paarlaateqatigiinnermi attartornermut ataatsimut 250 kr.-inik sullissinnermut akiliisitsisoqartarpoq.

Imm. 4. Attartortut inigisaminnik paarlaateqatigiissinnaapput imaaliorlutik:

1) Isumaqatigiissuteqarlutik attartornermut isumaqatigiissutertik paarlaallutik ingerlatiinnarumallugit.

Inigisamik paarlaateqatigiinneq aatsaat pisinnaavoq, attartortut marluk tamarmik kingusinnerpaamik qaammatit 36-it paarlaateqatigiinnissamut qinnuteqaat sioqqullugu attartornermut isumaqatigiissuteqarsimagunik. Attartortut pisinnaatitaaffitik pisussaataaffitillu aammalu attartornissamik isumaqatigiissutitik paarlaatissavaat. Attartortut qularnaveeqqutissatut akiligaat assigiinngippata, tamanna attartortitsisumit susassarineqanngilaq. Attartortitsisup attartortut pisinnaatitaaffimminnik pisussaaffimminnillu paarlaannerisa attartortut inatsisitigut inissisimaneritut sunniutissai pillugit ilitsersuutissavai.

2) Inissiat paarlaateqatigiinnermi nalinginnaasumik iluarsaanneqarnissaat imaluunniit nalinginnaasumik iluarsaanneqarsimanissaat isumaqatigiissutigigalugu. Attartortitsisoq inissianik attartornermut peqqussut sukkulluunniit atuuttoq naapertorlugu attartornissamik isumaqatigiissut nutaaq sanassavaa. Attartortut allakkatigut uppersarsassavaat inissiamut iserternissamut atatillugu attartugassap nutaap nalinginnaasumik iluarsaanneqarnissaa namminneerlutik isumagissinnaallugu. Taamaattumik inissiat taakku nuunnerup nalaani §§ 77-imut aamma 78-mut tunngatillugu iserternerup nalaani nalinginnaasumik iluarsaanneqarsimasutut isigineqassapput.

Imm. 5. Imm. 4, nr. 2 naapertorlugu inissianik paarlaateqatigiinnermi attartortitsisup attartortup attartugassamini nutaami nammineerluni nalinginnaasumik iluarsaassinissamik kissaateqarnera itigartissinnaavaa, nalinginnaasumik iluarsaassinermiit kingullermiit ukiut tallimat sinnerlugit qaangiussimappata.

Imm. 6. Imm. 4, nr. 2 naapertorlugu nalinginnaasumik iluarsaassinermut atatillugu inissiat paarlaateqatigiinnermi pineqartut nalinginnaasumik iluarsaassinermut nalaani inigineqarnerat pissutigalugu saniatigut aningaasartuuteqartoqassappat, saniatigut aningaasartuutit attartortumit qimatsisussamit akilernerqassapput.

Imm. 7. Atorfeqarnermut atasumik inissianik attartortut attartortitsisoq akuersiteqqaartinnagu inissianik paarlaasseqatigiissinnaanngilat.

Imm. 8. Namminerisamik kissaateqarluni nuussinaneq aamma inigisamik paarlaasseqatigiissinnaaneq pillugit Naalakkersuisut maleruagassanik erseqqinnerusunik aalajangersaasinnaapput.

§ 60. Attartortup toqunerani aapparisaq qimagaasoq atugassarititaasut atuinnarlugit attartornermik ingerlatseqqinnarsinnaatitaavoq. Taamatuttaaq inuk inissiamik attartornermut isumaqatigiisummi atsioqataasimanngitsoq, kisiannili sivikinnerpaamik ukiuni marlunni attartortup ataatsimut inoqutaannut peqataasimasooq pisinnaatitaaffeqarpoq, taamaattorli tak. § 63, imm. 3.

Imm. 2. Sulisunut inissiaq, attartortup pisortani sulisitsisuni atorfeqarnini aqutugalugu sulisunut inissiatut innersuunneqarfigisaa matumani pineqarpat, aappaasoq attartornermut atugassarititaasut atorlugit inissiamik innersuussivigineqarnissamik pisinnaatitaaffeqarpoq. Innersuussinissamut piumasaqaataavoq aappaasup nammineerluni pisortani sulisitsisuni atorfeqarnermigut sulisunut inissiamik innersuussivigineqarsinnaatitaanginnissaa, aammalu attartortup aappaasulluunniit sivikinnerpaamik ukiuni marlunni utaqqisut allattorsimaffianni nalinginnaasumi allaqqasimanissaa. Taamatuttaaq pisinnaatitaaffeqarpoq inuk sivikinnerpaamik ukiuni marlunni attartortup ataatsimut inoqutaannut peqataasimasooq, taamaattorli tak. § 63, imm. 2.

Imm. 3. Attartortoq utoqqalinini nappaateqarniniluunniit pissutigalugit paaqqinnittarfimmut assigisaanulluunniit nuuppat, imm. 1-2-mi aalajangersarneqartut atorineqassapput.

§ 61. Attartortup averusernerani avinneraniluunniit imaluunniit aappariinneriinnerup atorunnaarsinneqarnerani aappariinni arlaat attartornerup ingerlateqqinnissaanut pisinnaatitaassanersoq aappariit isumaqatigiissutigisinnaavaat. Aappariit isumaqatigiissinnaangippata aappariinni arlaat attartornerup ingerlateqqinnissanut pisinnaatitaassanersoq akuersissuteqarnikkut imaluunniit eqqartuussinermi aalajangiinikkut tamanna aalajangiiffigineqassaaq, taamaattorli tak. § 63, imm. 4.

Imm. 2. Attartortup aappani qimappagu, aappaasup attartorneq ingerlatiinnarsinnaavaa.

Imm. 3. Eqqartuussinermi aalajangiinikkut attartornermik ingerlatitseqqinnissamut pisinnaatitaaffik aalajangiiffigineqarpat, pingaartumik meeqqat sulii inersimasutut oqartussaassuseqalersimanngitsut immikkut pingaartillugit isiginiarneqassapput, averuserneq avinnerluunniit persuttaanermik imaluunniit timikkut allatigut nakuuserfigineqarsimanermik pinerluttulerinermut inatsimmi ilaatinneqartumik peqquteqarnersoq isiginiarneqassalluni.

§ 62. Inuit sivikinnerpaamik ukiuni marlunni ataatsimut inoqutigiissimasut inooqatigiinnerminnik taamaatitsigunik, arlamik sorliup attartorneq ingerlatiinnarsinnaassaneraa isumaqatigiissutigisinnaavaat. Attartortitsisoq isumaqatigiisummut akerliussinnaavoq, attartortitsisoq taamaaliornissamut pingaarutilinnik pissutissaqaruni, taamaattorli tak. § 63, imm. 4.

Imm. 2. Pineqartut akornanni isumaqatigiittoqarsinnaangippat, taakku arlaat inissiamik attartornerup ingerlateqqinnissaanut pisinnaatitaassanersoq eqqartuussinikkut aalajangiisoqassaaq. Eqqartuussinermi aalajangiinnermi pingaartumik meeqqat sulii inersimasutut oqartussaassuseqalersimanngitsut immikkut pingaartillugit isiginiarneqassapput, kiisalu aamma averuserneq avinnerluunniit persuttaanermik imaluunniit timikkut allatigut nakuuserfigineqarsimanermik pinerluttulerinermut inatsimmi ilaatinneqartumik peqquteqarnersoq isiginiarneqassalluni.

§ 63. Attartortup pisinnaatitaaffiit, §§ 58-62 naapertorlugu attartortumut allanulluunniit pisinnaatitaaffiliunneqartut taamaatissinnaangilai, taamaattorli tak. imm. 2-4.

Imm. 2. Inissiaq sulisunut inissiaappat atorffimmut aalajangersimasumut atugassanngortitaasoq § 60, imm. 2-mi aalajangersakkat atuutissanngillat. Tassunga taarsiullugu inissiamik allamik

innersuussisoqarsinnaavoq, tak. § 5, imm. 1, nr. 4.

Imm. 3. § 60, imm. 1-mi aalajangersakkat inissianut innarluutilinnut inissiatut immikkut aaqqissukkanut atugassanngortinneqarsimasunullu atuutinngillat. Tassunga taarsiullugu inissiamik allamik innersuussisoqarsinnaavoq, tak. § 5, imm. 1, nr. 5.

Imm. 4. Inissiaq atorfeqartitaanermut atatillugu atugassanngortitaasimappat imaluunniit innarluutilinnut inissiatut innersuussaasimappat, tamatumani pissutsit immikkut ittut pineqanngippata §§ 61-imi aamma 62-mi aalajangersakkat atuutissanngillat.

Kapitali 10

Attartormik taamaatitsineq

§ 64. Attartortup inissiamik attartormut isumaqatigiisummi § 69, imm. 2-mi siumut ilisimatitsinissamut piumasarisaasut malillugit attartornini atorunnaarsissinnaavaa. Taamaattorli attartortup aapparisanu akuersiteqqaarnagu ilaqtariit inigisaannik attartorneq imaluunniit aappariit aapparissalluunniit suliffeqarfianut atatillugu attartorneq atorunnaarsissinnaanngilaa. Attartortup taamaatitsinera allakkatigut nalunaarutigineqassaaq.

§ 65. Atorfeqarnerup unitsinneqarnerani atorfilik pisussaavoq inissiamik taamaatitsinissani allakkatigut nalunaarutigissallugu. Atorfillip akiligassat ingerlaavartut attartukkamut attuumassuteqartut, taamaatitsinissamut siumoortumik nalunaarfissatut piffissarititaasup nalinginnaasup naanissaata tungaanut akiligassarai, taamaattorli tak. § 70, imm. 3.

Imm. 2. Sulisunut inissiaq attartugaq kingusinnerpaamik qimareersimaneqassaaq nalinginnaasumik taamaatitsinnisaamut nalunaarfissatut piffissarititaasupnaanginnerani.

§ 66. Attartortitsisup attartornerit imaattut allakkatigut atorunnaarsittassavai:

- 1) Ineeqqat, attartortitsisup inigisaani inissiap ilaaniittut, imaluunniit ilaqtariinnut ataatsinut illuni illuniluunniit affarleriinni attartortitsisup najugarisaata ilaaniittut.
- 2) Illumi najugaqarfittut inissiat, piffissami atorunnaarsitsiviusumi najugaqarfittut inissiat marluinnaatillugit, aappaanilu piginnittoq najugaqartillugu.

§ 67. § 66-imi taaneqartut saniatigut attartornerni allani attartortitsisoq taamaallaat atorunnaarsitsinnaavoq:

- 1) Attartortitsisup attartortitamini nammineerluni najugaqalivinniarluni nalunaarutigippagu, imaluunniit attartortitsisoq pingaarutilinnik tunngaveqarluni attartormik atorunnaarsitsinissamut immikkut pissutissaqartitsippat, aammalu atorunnaarsitsiniarluni nalunaaruteqarneq illuatungeriinnut tunngasut nalilerneqarnerat aallaavigalugu naammaginatutut isigineqarsinnaappat.
- 2) Attartortitsisup illumik iluarsaassinisaaq isaterinissarlunniit peqqutaalluni attartorneqartooq qimanneqartariaqartooq uppersarsarpagu.
- 3) Attartortooq illup ingerlanneqarnerani suliaqartussatut atorfeqartitaasimappat, inissiarlu attartortitseqqinnermi atorfimmit taartaasumut atorineqassappat.
- 4) Attartortooq attartortitsisumit allakkatigut mianersoqqussutit tunineqartaraluarluni pissuserisassanik malinninngippat, imaluunniit pissusilersornera illumut ineqartunulluunniit allanut akornutaappat,

pissutsilli imaanngippata attartortitsisup attartornermik isumaqatigiissut atorunnaarsisinnaallugu. Attartortoq allakkatigut mianersoqqussutsinik inassutinilluunniit pingasunik qaammatit tullerit aqqaneq marluk iluanni tiguisimasussaavoq.

§ 68. Namminersornerullutik Oqartussat imaluunniit kommunep inissiamik attartukkamik nutarterinissaq isaterinissarlunniit pissutigalugu attartorneq atorunnaarsissappagu, tak. § 67, nr. 2, attartortoq inissiamik taartissamik innersuussivigineqassaaq, tak. § 5, imm. 1, nr. 1. Inissiamik taartissamik innersuussisussaataaneq taamaallaat atuutissaaq, attartortup attartornermut isumaqatigiisummi Namminersornerullutik Oqartussanit kommunemilluunniit attartornermik atorunnaarsitsinerup nalaani attartornissamik isumaqatigiisummik attartortoq eqqortitsisimappat.

Imm. 2. Attartortut iluarsaassinerup kingunerisaanik inissiamik taartissamik innersuussivigineqartut iluarsaassinerup naammassereerneratigut illuni iluarsaanneqarsimasuni inissiamik innersuussivigineqarnissamut salliutinneqartussaataapput, attartortullu isaterinerup kingunerisaanik inissiamik taartissamik innersuussivigineqartut illunut isatikkanut taartissatut inissiaqarfimmi sananeqartunut inissiamik innersuussivigineqarnissamut salliutinneqartussaataitaallutik.

Imm. 3. Salliutinneqartussaataaneq taamaallaat atuutissaaq attartortup inissiami taartissatut innersuussivigineqartumi attartornermut isumaqatigiissut eqqortissimappagu, aammalu attartortup inissiamik innersuussivigineqarnissamut piumasaqaatit allat naammassisimappagit. Attartortitsisup pissutsit annertuumik pingaaruteqanngitsut, imaluunniit attartortumit piffissami iluarsaassinissaq isaterinissarlunniit pissutigalugit attartornermik attartorunnaarsitsinissamik nalunaaruteqarfup nalaani aqqinneqarsimasut pissutiginiarsinnaanngilai.

Imm. 4. Attartortup attartukkani qimassappagu, tak. imm. 1, attartortitsisup attartortoq taarsiissuteqarfigissavaa, inissiamut ataatsimut tunngaviusumik 1.200 kr.-inik amerlassuseqartunik, ininut najugaqarfiusunut tamanut immikkut 1.000 kr.-inik ilassusikkanik. Attartortitsisup attartortoq iluarsaassinerup naammassinerani attartortup inigisaminut uterneranut atatillugu imaluunniit isaterinerup kingorna nutaamik sanaqqiinnermi illuummut nutaamut attartulerneranut atatillugu taamatorpiaq taarsiissuteqarfigissavaa, tamatumunngali piumasaqaataavoq attartortup attartornissamik isumaqatigiisummik eqqortitsisimanissaa.

Imm. 5. Imm. 4-mut atatillugu aningaasartuutit illuummi iluarsaassinissamut isaterinissamulluunniit aningaasaliissutit aqqutigalugit akilerneqassapput.

§ 69. § 67 naapertorlugu attartortitsisup atorunnaarsitsiniarnera allakkatigut nalunaarutigineqassaaq, aammalu attartortup imm. 2 naapertorlugu akerriliissuteqarsinnaaneranut paasissutissanik imaqaassalluni. Aammattaaq atorunnaarsitsissut atorunnaarsitsinermut tunngaviusoq pillugu paasissutissanik imaqaassaaq.

Imm. 2. Attartortup atorunnaarsitsissut akueriumanngikkuniuk, attartortoq atorunnaarsitsissutip tiguneraniit sapaatit akunneri arfinillit qaangiutsinnagit allakkatigut akerriliissuteqassaaq. Attartortitsisup atorunnaarsitsissut atuutsinnarniarlugu kissaatiguniuk, attartortitsisoq sapaatit akunneri allat arfinillit qaangiutsinnagit eqqartuussivimmi suliassanngortitsissaaq. § 67, nr. 2 aamma 3 naapertorlugit Namminersornerullutik Oqartussat kommunellu inissiaataanni attartortittakkani attartornermik atorunnaarsitsinermut akerriliissut kinguartitsigallarnermik kinguneqarsinnaanngilaq.

§ 70. Attartortitsisumit atorunnaarsitsisoqassaaq sivikinnerpaamik qaammatinik pingasunik siumut ilisimatitseeernikkut, qaammatip naanerani atuuttussanngorlugu, taamaattorli matumani ineeqqanik attartortitsineq pineqarpat qaammammik ataasiinnarmik siumut ilimatitsinikkut atorunnaarsitsisoqarsinnaavoq, tak. § 66, nr. 1.

Imm. 2. Attartortup tungaaniit atorunnaarsitsiniarneq allakkatigut sivikinnerpaamik qaammammik ataatsimik siumut ilimatitseeernikkut, qaammatip naanerani atuuttussamik pissaaq. Taamaattorli inisiamik namminersortumit pigisamik attartortitsisup attartortullu isumaqatigiissutigisinnaavaat, attartortup tungaaniit atorunnaarsitsiniarneq allakkatigut sivikinnerpaamik qaammatinik pingasunik siumut ilisimatitseeernikkut, qaammatip naanerani atuuttussamik pissasoq. Piumasaqaat atuutissaguni attartornissamik isumaqatigiissummi immikkut ittumik erseqqissarneqassaaq.

Imm. 3. Attartortoq piffissaq ilisimatitsissutaasoq suli naanngitsoq inissiamiit nuuppat, attartortitsisup attartukkap allamut attartorteqqinnissaa anguniassavaa. Attartortitsisup allamut attartortitsinermini isertitai isertitassaraluiluunniit attartortumut piumasaqaatigisaanit ilanngaatineqassapput.

§ 71. Attartornermut isumaqatigiissut piffissamut aalajangersimasumut atuuttussanngortitaasimappat, piffissap attartornissamut isumaqatigiissuteqarfusup naanerani siumut ilisimatitsinertaqaanngitsumik attartorneq unitsinneqassaaq. Attartornermut isumaqatigiissut piffissamut aalajangersimasumut atuuttussanngortitaasoq piffissap attartorfusup ingerlanerani atorunnaarsinneqarsinnaanngilaq, tamatumani attartornermut isumaqatigiissutip atorunnaarsinneqarsinnaanera allaganngorlugu isumaqatigiissutigineqarsimanngippat.

Imm. 2. Imm. 1-imi aalajangersarneqartut apeqqutaatinnagit attartortup attartornissamut isumaqatigiissut kapitali 11-mi aalajangersakkat malillugit atorunnaarsissinnaavaa, pissutsit attartortumut assuarliutigineqarsinnaasut annertuumik pingaaruteqarpata.

Imm. 3. Attartortup attartortitsisup ilisimasaanik attartornerup piffissamut aalajangersimasumut atuuttussanngortitaasup naareernerani attartukkani atuinnaq, attartorneq attartornermut nalinginnaasumut piffissamut aalajangigaanngitsumut ingerlaannartumik nuussaaq, inatsisitigut sunniutissai tassunga attuumassutillit atuutsilerlutittaaq.

§ 72. §§ 67 – 71-imi maleruagassat attartortumut ajoqutaasumik isumaqatigiissuteqarnikkut sanioqqunneqarsinnaanngillat.

Kapitali 11

Attartortitsisup attartornermut isumaqatigiissummik atorunnaarsitsisinnaatitaanerani pisinnaatitaaffik

§ 73. Pisortaniit attartortitsisup attartornermut, imermut, kiassanermut imaluunniit qularnaveeqqusiissutissamut akiliutissanut akiliinngitsoornerup kingunerisaanik attartornissamik isumaqatigiissut atorunnaarsissinnaavaa, tak. §§ 37, imm. 1, 38, imm. 1, aamma 74, imm. 1. Inissiani attartortittakkani namminersortunit pigisani attartortitsisup pissutissat ataani taaneqartut kingunerisaanik attartornissamik isumaqatigiissut atorunnaarsissinnaavaa.

Imm. 2. Attartortitsisup attartornissamik isumaqatigiissut atorunnaarsissinnaavaa imatut pisoqartillugu:

- 1) Inissiaq unioqqutitsilluni atorneqarpat, tak. § 48, imm. 2 aamma 3.
- 2) Inissiaq piffissaanngitsukkut qimanneqarpat, tak. § 48, imm. 5.

3) Unioqqutitsilluni attartortitsisoq inissiamut iseqqusaanngippat, tak. § 49, imm. 1.

4) Torersaarnissamut maleruagassat unioqqutinneqarpata, tak. § 50.

Imm. 3. Attartortitsisup aatsaat attartorneq atorunnaarsissinnaavaa, pissutsit attartortumut assuarliutaasut annertuumik pingaaruteqarpata. Attartortitsisup attartornermik atorunnaarsitsinnginnermini attartortoq pissutsinik aaqqeeqqullugu peqqussavaa, attartortitsisullu attartornissamik isumaqatigiisummik atorunnaarsitsinnginnerani pissutsit imm. 1-imi aamma imm. 2, nr. 1-4-mi taaneqartut aaqqinneqarsimappata attartortitsisup taakku tunngaviginiarsinnaanngilai.

§ 74. Pisortaniit attartortitsisup kingusinaartumik akiliisoqartillugu attartornermik isumaqatigiissut atorunnaarsissaavaa, tak. § 73, imm. 1, attartortup tamanna pillugu piumasaqaatip allakkatigut attartortumut takkunnerata kingorna kingusinnerpaamik ulluinnaat pingasut qaangiunneranni akiligassanut kinguaattoorutit iluarsisimanngippagit. Attartortitsisup akileeqqusissutaa ullup piffissaq eqqorlugu akiliiffissap kingulliup kingornatigut tunniunneqassaaq, tassanilu paatsuugassaanngitsumik allassimassaaq, attartornermut akiliutissanut kinguaattoorutit piffissamik killiliussap naannginnerani akilerneqanngippata attartortitsineq atorunnaarsinneqassasoq.

Imm. 2. Namminersortut inissiaatinik attartortitsisup kingusinaartumik akiliisoqartillugu attartornermik isumaqatigiissut atorunnaarsissinnaavaa, tak. § 73, imm. 1, attartortup tamanna pillugu piumasaqaatip allakkatigut attartortumut takkunnerata kingorna kingusinnerpaamik ulluinnaat pingasut qaangiunneranni akiligassanut kinguaattoorutit iluarsisimanngippagit. Attartortitsisup akileeqqusissutaa ullup piffissaq eqqorlugu akiliiffissap kingulliup kingornatigut tunniunneqassaaq, tassanilu paatsuugassaanngitsumik allassimassaaq, attartornermut akiliutissanut kinguaattoorutit piffissamik killiliussap naannginnerani akilerneqanngippata attartortitsineq atorunnaarsinneqassasoq.

Imm. 3. Attartortitsisoq akileeqqusissummut sullissinermut akiliutitut annerpaamik 150 kr.-inik akileeqqusisnaavoq.

Imm. 4. Attartortitsisup attartornissamik isumaqatigiissut atorunnaarsissimappagu, attartortitsisoq atorunnaarsitsinermik atorunnaarsitsinermut annerpaamik 150 kr.-inik sullissinermut akileeqqusisnaavoq.

§ 75. Attartortitsisup attartortitsineq erngerluni atuutilersussamik atorunnaarsissinnaavaa, attartortoq illumut, attartortitsisumut, taassuma atorfeqartitaannut, illumi attartortunut allanut inatsisit malillugit eqqortumik illumiittunut annertuumik ajoqutaasumik pissusilersorpat, taamatuttaaq:

1) Attartortoq inunnut pineqartunut nakuuserpat imaluunniit persuttaanissamik siorasaarippat.

2) Attartortup pissusilersornera illumut imaluunniit inunnut pineqartunut ulorianartorsiortitsisinnaappat, matumani ilanngullugit sakkunik atuisimappat imaluunniit attartorneqartumi atortunik ulorianartunik uninngatitaqarpat.

Imm. 2. Attartortitsineq atorunnaarsinneqarsinnaavoq, tamatumani pissusilersornerit imm. 1-imi taaneqartut attartortumit namminermi, attartortup inoqutaanit allanilluunnit attartortup attartukkamut isersinnaatitaanit piliarineqarnersut apeqqutaatinnagu, tak. § 58.

§ 76. Pissutsit §§ 73-imi aamma 75-imi taaneqartut píssutaallutik attartorneq atorunnaarsinneqarpas, attartortoq píssusaavoq erngerluni attartukkamini anissalluni, aammalu ineqarnermut akiliut, aammalu attartortup inissiamiit nuunnissaanut siunut nalunaarfissap nalinginnaasup naanissaata tungaanut

attartukkamut akiligassat allat akilissallugit. Kiisalu attartortoq pisussaavoq sumiginnaanerup kingunerisaanik attartortitsisup annaasai taarsissallugit, matumani ilanngullugit attartukkamut anisitsinermut aningaasartuutit.

Imm. 2. Attartortitsisup attartukkap allamut attartorteqqinnissaa anguniassavaa. Attartortitsisup allamut attartortitsinermi isertitai piffissamiluunniit imm. 1-imi taaneqartumi isertitassaralui attartortumut piumasaqaatigisaanik ilanngaatineqassapput.

Imm. 3. Naalakkersuisut Namminersornerullutik Oqartussat kommunellu inissiaataanni attartortittakkani attartornermik atorunnaarsitsisarneq pillugu maleruagassiussapput.

Kapitali 12

Attartortup inigisaq qimallugu nuunnera

§ 77. Inissiamit anisoqarnerani inissiaq nalinginnaasumik iluarsaanneqassaaq, tassanilu pineqarput qilaavinik qaqsarsallugit qalipaaneq, iiganik qalipaaneq aamma/imaluunniit ungalitserisueq kiisalu eqqiaaneq. Natii nutaamik lakkersimasutut isikkoqassapput, taamaattorli tak. imm. 3.

Imm. 2. Attartortup nammineerluni nuunnerminut atatillugu nalinginnaasumik iluarsaassinissani kissaatigippagu, iluarsaassineq assasornermik ilinniagaqarsimasutut illersorneqarsinnaasumik pitsaassuseqartillugu suliarineqassaaq. Attartornermik unitsitsinissaq imaluunniit atorunnaarsitsinissaq naapertorlugu inissiap qimanneqarnissaa, inissiap takuniarneqarnissaa sioqqullugu suliaq naammassereersimassaaq, tak. § 79.

Imm. 3. Attartortup inissiamut iserternerani inissiaq nalinginnaasumik iluarsaanneqarsimanngippat, attartortup inissiaq iserternermini pissuserisaatut itsillugu tunniutissavaa.

Imm. 4. Attartortitsisup imm. 1-imi aamma 2-mi aalajangersakkat sanioqqussinnaavai, attartornerup atorunnaarnerata nutaamillu aallartitsinerup kingorna inissiap iluarsaanneqarnissaa annertuunik ajornartorsiutitaqarpat. Attartornerup atorunnaarnerani tamatumunnga taarsiullugu attartortoq inissiamik attartornerup nalaani nungullarnernut naleqquttumik annertussusilinnik akiliuteqassaaq. Akiliutissaq qaammammut ataatsimut inimut ataatsimut 50 kr.-inik annertussuseqarpoq. Attartortitsisup nalinginnaasumik iluarsaassinermut aningaasartuutit attartortup inissiamik tigusineraniit qaammatit 100-t ingerlanerini tigujuartuaassavai.

Imm. 5. Naalakkersuisut inissiamit aninermi nalinginnaasumik iluarsaassisarneq aamma attartortup tamatumunnga atatillugu aningaasartuutigisaanut ajunngitsorsiassaqaqtarneq pillugu maleruagassiorsinnaapput.

§ 78. Attartortitsisup § 77 malillugu nalinginnaasumik iluarsaassinermut aningaasartuutit attartortup inissiamik tigusineraniit qaammatit 100-t ingerlanerini tigujuartuaassavai. Piffissaliussatut aalajangiunneqartup naannginnerani inissiamit anisoqarnerani attartortup taamaallaat aningaasat piffissami tassani attartortitsinerup atorunnaarfignissani attartortitsisumit akilerneqartussanngorsimanngitsut akilissavai.

§ 79. Attartortitsineq atorunnaarsinneqartussanngorsimappat imaluunniit inissiaq allamik pissuteqartumik qimanneqartussanngorsimappat attartortitsisup attartortullu piffissaq qimatsivissaq inissiamillu misissuisoqarnissaa allaganngorlugu isumaqatigiissutigissavaat. Attartortoq immikkut

ilisimasalimmik ilaqarluni misissuinnermut peqataanissamut pisinnaatitaavoq. Attartortitsisup sivikinnerpaamik ullunik arfineq-marlunnik siumut ilisimatitsinermigut attartortoq misissuinnermut peqataaqqullugu noqqaaffigissavaa.

Imm. 2. Misissuinnermi attartortitsisoq misissuisinnermut nalunaarusiussaaq, tassanilu amigaataasinnaasut paarinerlutallu attartortitsisup isumaa malillugu attartortup akisussaaffigissasai allassimassapput. Attartortoq taakkununga isumaqataangippat, tamanna attartortup isumai taallugit nalunaarusiami allanneqassapput. Nalunaarusiaq misissuinnermut atatillugu illuatungeriinnit atsiorneqassaaq. Attartortoq taannaluunniit sinnerlugu takkuttoq misissuinnermut nalunaarusiap assinganik tunineqassaaq. Tamatuma kingorna attartortup tamanna piumasarippagu, pissutissaqanngitsumik uninnganertaqanngitsumik suliassat attartortitsisup isumaa malillugu attartortumit akilernerqartussanut suliassat qanoq akeqarnissaanik missingersuummik allakkatigut nalunaarfigineqassaaq.

Imm. 3. Attartortup inissiamik qimatsinissani kingusinnerpaamik ullunik arfineq-pingasunik sioqqullugu najugaq nalunaarutit nassiunneqartarfissaat nalunaarutigissavaa.

§ 80. Attartortoq taassumaluunniit piginnaatitaa misissuinnermut takkutinngippat, attartortitsisoq pisinnaatitaavoq nalunaarusiaq tunngavigissallugu attartortullu qularnaveeqqusiissutaasa nalinginnaasumik iluarsaassinnermut aningaasartuutissanut, tak. §§ 77, imm. 2 aamma 78, matussutigineqarnissannut aamma attartornermik isumaqatigiissut naapertorlugu attartortup pisussaaffinut matussutigineqarnissannut atussallugit.

Imm. 2. Attartortitsisup amigaatit misissuinnerup nalaanni pissusissaatut malugineqarsinnaasimagaluit piumasaqaatigisinnaanngilai, tamatumani attartortoq peqquserlulluni iliuuseqarsimanngippat.

Imm. 3. Attartortitsisoq inissiami qimanneqartumi paarsinerluttoqarsimaneranik aserorterisoqarsimaneranilluunniit uparuaasimappat, pissutsit annertussusiilu immikkoortillugit uppersaaserneqassapput.

Kapitali 13

Nakkutilliineq

§ 81. Namminersornerullutik Oqartussat kommuuniluunniit inissianik allaffissornikkut aqutsisussamik avataaniit pissarsisimappat, Naalakkersuisut imaluunniit Kommunalbestyrelsep nakutigissavaa, inissianik allaffissornikkut aqutsisup suliani Inatsisartut peqqussutaat manna aamma aalajangersakkati peqqussut manna naapertorlugu suliarineqartut naapertorlugit suliarinerai.

Imm. 2. Kommune nammineerluni inissiatiminik allaffissornikkut aqutsinnermik isumaginnittuuguni, kommunep suliani Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit isumagissavai.

Imm. 3. Namminersornerullutik Oqartussat kommuneluunniit aningaasatigut nakkutilliisussaataitanini, tak. imm. 1, naammassiniarlugu inissianik allaffissornikkut aqutsisup kukkunersiuisua inissianik allaffissornikkut aqutsisup suliani Inatsisartut peqqussutaat manna aamma aalajangersakkat peqqussut manna naapertorlugu suliarineqartut naapertorlugit suliarinerai nalunaarusiortissinnaavaa.

Imm. 4. Kommunep inissiaatiminik nammineq allaffissornikkut aqutsisup ukiumoortumik suliassat Inatsisartut peqqussutaat manna aamma aalajangersakkat peqqussut manna naapertorlugu

suliarineqartut naapertorlugit isumagineqarnerat pillugu kukkunersuiisuni ukiumoortumik nalunaarusiortittassavaa.

Imm. 5. Naalakkersuisut Namminersornerullutik Oqartussat kommunellu inissiaataat attartortittakkat najugaqatigiiffillu nakkutigineqarnerat, matumani ilanngullugit inissianik piginnittup imaluunniit aqutsisup aningaasaatinik aqutsinera, missingersuusiortarnera, naatsorsuutininik saqqummiisarnera kukkunersuiisoqarneralu, pillugu maleruagassiorsinnaapput.

Kapitali 14

Ineqarneq pillugu maalaaruteqartarfik

§ 82. Namminersornerullutik Oqartussat kommunellu inissiaataanni attartortittakkani attartortut attartortitsisullu akornanni aaqqiagiinngissutit, tak. § 84, suliarineqarnissaannut Naalakkersuisut ineqarneq pillugu maalaaruteqartarfimmik pilersitsisinnaapput, taannalu siulittaasoqassaaq maalaaruteqartarfimmilu pingasunik nalinginnaasunik ilaasortaqaassalluni.

Imm. 2. Siulittaasoq taassumalu sinniisissaa Naalakkersuisup ineqarneq pillugu suliaasaqarfimmut akisussaasuusup innersuussuteqarneratigut Naalakkersuisunit toqqarneqassapput, taakkulu marluullutik ineqarnermi pissutsinut immikkut ilisimasaqassapput imaluunniit inatsisilerituutut soraarummeersimassallutik. Maalaaruteqartarfimmut ilaasortaqaq ataaseq taassumalu sinniisissaa A/S Inissiaatileqatigiiffik INI-p innersuussuteqarneratigut Naalakkersuisunit toqqarneqassapput. Maalaaruteqartarfimmut ilaasortaqaq ataaseq taassumalu sinniisissaa KANUKOKA-p inassuteqarneratigut Naalakkersuisunit toqqarneqassapput, aammalu maalaaruteqartarfimmut ilaasortaqaq ataaseq taassumalu sinniisissaa Ineqartut Peqatigiiffiisa Kattuffiata IPK-p inassuteqarneratigut Naalakkersuisunit toqqarneqassallutik, taamaattorli tak. imm. 6. Maalaaruteqartarfimmut ilaasortat pingasut nalinginnaasut taakkulu sinniisissaat ineqarneq pillugu sulianut tunngasunik ilisimasaqassapput.

Imm. 3. Siulittaasumik, ilaasortanik sinniisissanillu toqqaaneq ukiut sisamat tikillugit atuuttassaaq.

Imm. 4. Siulittaasoq sinniisissaaluunniit piginnittut kattuffiannut, inissiaatileqatigiit kattuffiannut imaluunniit attartortut kattuffiannut immikkut attuumassuteqartuussanngilaq, imaluunniit inuussutissarsiutigalugu illuutininik nioqquteqarnermut akuliusimasuussanani.

Imm. 5. Maalaaruteqartarfimmut ilaasortaqaq sinniisussaaluunniit pissusissamisoortumik aggersarneqareernermini maalaaruteqartarfimmut aggernissamut pisussaaitaavoq. Naalakkersuisut ineqaneq pillugu maalaaruteqartarfimmi ataatsimiinnissamut takutinngitsoornerup kingunerisassai pillugit sukumiinerusunik maleruagassiorsinnaapput.

Imm. 6. IPK maalaaruteqartarfimmut ilaasortassamik toqqaanngippat, maalaaruteqartarfimmut ilaasortassamik innersuussisinnaatitaaneq suliniaqatigiiffinnut ukununnga, taaneqartut tullerijaaarneri malillugit tutsinneqassaaq: SIK, IMAK aamma PPK.

§ 83. Naalakkersuisut maalaaruteqartarfiup atortussatut pisariaqartitaannik atugassiissapput, aammalu pisariaqartitsinikkut allaffeqarfimmiit ikiorneqarnissaat isumagissallugu.

Imm. 2. Maalaaruteqartarfiup sulineranut aningaasartuutit Naalakkersuisunit akilernerqartassapput, matumani ilanngullugit siulittaasup ilaasortallu suliaminnut atatillugu akiliussigallarnerannut, tak. imm. 5, kiisalu allaffissornermut il.il. aningaasartuutit. Ineqarneq pillugu maalaaruteqartarfimmi ilaasortat Inatsisartunut, Naalakkersuisunut il.il. ilaasortat akissarsiaqartitaanerat pillugu Inatsisartut inatsisaanni

maleruagassat naapertorlugit akissarsiaqartinneqassapput, ullormusiaqartinneqarlutik angalanermilu aningaasartuutitut ajunngitsorsiasaqartinneqassallutik. Aningaasartuutit taakku ukiumoortumik Nunap Karsianit tapiissutigineqartut iluanniit akilerneqartassapput.

Imm. 3. Maalaaruteqartarfik oqarasuaatit atorlugit ataatsimiissinnaavoq, maalaaruteqartarfimmi ilaasortat tamarmik illoqarfimmi, maalaaruteqartarfiup allattoqarfeqarfigisaani najugaqanngippata.

Imm. 4. Ineqarneq pillugu maalaaruteqartarfik ukiumoortumik nalunaarummik saqqummiussisassaaq, ilaatigut suliassat takkuttut suliallu naammassineqartut pillugit kisitsisitigut takussutissanik, kiisalu aalajangiisarnertit ataasiakkaat inernerinik naatsunngorlugit saqqummiunneqarnerinik imaqartunik.

Imm. 5. Aningaasartuutitut imm. 2-mi taaneqartunut matussutissatut, Naalakkersuisut attartortitsisoq peqqusinnaavaat ukiumoortumik ineqarnermut akiliutit aqqutigalugit akiliutissat attartortunut ataasiakkaanut akilerseqqullugit akileqqullugillu. Attartortitsisup akiliutissat ukiumi akiliiffusussami kingusinnerpaamik januaarip ulluissa 31-anni Naalakkersuisunut akilissavai. Akiliutissaq piffissaq eqqorlugu akilerneqanngippat, Naalakkersuisut missingiillutik pisassanik attartortitsisumut ilanngaateqartassapput. Akiliutissaq ukiumoortumik Inatsisartut aningaasanut inatsisaannut oqaasertaliinikkut annertussusilerneqartassaaq.

Imm. 6. Naalakkersuisut maalaaruteqartarfiup suliai, matumani ilanngullugit ataatsimiittarnertit akuttussusissaat suleriaasissarlu pillugit sukumiinerusunik maleruagassiorsinnaapput.

§ 84. Ineqarneq pillugu maalaaruteqartarfiup attartortut maalaarutaat makkununga tunngasut suliarisarpai:

- 1) Ineqarnermut akiliutininik qaffaanissamik siumoortumik ilisimatitsisarnermi piumasarisat, tak. § 28, imm. 2.
- 2) Aserfallatsaaliuineq iluarsaassinerlu, tak. § 45.
- 3) Inissiap iserterfigineqarnerani qanoq issusia, tak. § 47.
- 4) Attartukkami atortut ikkussukkat pitsanngorsaanerillu (atuisinnaatitaaneq), tak. §§ 51 aamma 55.
- 5) Attartortup attartukkaminik atuinera (torersaarnissamik malittarisassanik unioqqutitisinerit), tak. § 50.
- 6) Atuisinnaatitaanerup allanut tunniunneqarnera (inissianik paalaateqatigiinneq, attartukkamik allamut utaqqiisaasumik attartortitsigallarneq aamma attartornermik nangitsineq), tak. §§ 58-62.
- 7) Inissiamit aninermit inissiap qanoq issusia (iluarsaassineq nalinginnaasoq), tak. § 77.

Imm. 2. Maalaarutit ineqarneq pillugu maalaaruteqartarfimmut allaganngorlugit tunniunneqartassapput, aammalu maalaaruteqartup maalaaruteqartarfiup sumik isummerfigisaqarnissaanut kissaataanik erseqqissaassummik imaqassalluni. Maalaarummut pissutsinut attartortup suliaritikkusutaanut uppersaattissat pisariaqartinneqartut ilaatinneqassapput.

Imm. 3. Maalaarutip ineqarneq pillugu maalaaruteqartarfimmi suliarineqarnissaanut attartortoq annerpaamik 500 kr.-inik sullissinermit akiliummik akiliuteqartinneqassaaq. Maalaaruteqartoq maalaarutigineqartoq pillugu taparserneqarpat imaluunniit suliaq ineqarnermut maalaaruteqartarfimmi suliarineqarnissaminut naleqqutinngitsutut itigartinneqarpat aningaasat sullissinermit akiliutigineqartut maalaaruteqartumut utertinneqassapput.

Imm. 4. Attartortup suliaq eqqartuussivinnut suliakkiissutigineqareersoq ineqarneq pillugu maalaaruteqartarfimmut suliakkiissutigineqarnissaa kissaatigippagu, maalaaruteqartarfik maalaarutip suliarinissaanut itigartitsissaaq.

§ 85. Ineqarneq pillugu maalaaruteqartarfiup maalaarut, maalaaruteqartarfimmi suliarineqarnissamut naleqqutinnngitsutut nalilerneqartoq suliarinissaa itigartissavaa.

Imm. 2. Maalaaruteqartarfiup maalaarut attartortup taperse neqarnissaanik ilimanaateqanngitsutut isigisariaqartoq suliariumanngissinnaavaa.

Imm. 3. Maalaaruteqartarfiup allattoqarfik imm. 1-imi 2-milu aalajangigassanik taaneqartunik aalajangiinissamut pisinnaatissinnaavaa.

Imm. 4. Ineqarneq pillugu maalaaruteqartarfiup allattoqarfiata aamma siulittaasup maalaaruteqarfiup tullianik ataatsimiinnissami suliaassat piareersassavaat. Siulittaasoq aalajangiisinnaavoq suliaassaq aalajangersimasooq misissorneqassasooq imaluunniit erseqqinnerusumik qulaajaaffigineqassasooq suliaassap qanoq inernilerneqarnissaa pillugu inassuteqaammik suliaqarnermut atasumik. Tassunga atatillugu siulittaasup piumasarisinnaavaa suliami ilaasut illuatungeriit, pisortat aamma namminersortut paasissutissanik tunniussissasut.

Imm. 5. Suliaq suliarisassanngortinneqarluni ilanngunneqarneraniit kingusinnerpaamik sapaatit akunnerisa marluk qaangiunnerini maalaaruteqartarfiup allattoqarfiata suliami illuatungiliuttuq suliaqkiissuteqarneq pillugu ilisimatissavaa, tassanilu nalunaarutip nassiunneraniit sapaatit akunneri pingasut qaangiutsinnagit illuatungiliuttup suliamut isummaminik saqqummiussisinnaanera allanneqassaaq. Piffissamik killissarititaasooq tamanna maalaaruteqartarfiup sivitsorsinnaavaa, tamatumani immikkut ittunik pissutissaqartoqarpat.

Imm. 6. Allattoqarfik siulittaasup suliami pineqarlutik ilaasunut allanulluunniit apeqqutigisaanut akissuteqarnissamut piffissamik killiliissaaq, tamatumani nalinginnaasumik sapaatit akunneri pingasut qaangerneqarsinnaanngillat. Nalunaarutip nassiunneraniit piffissamut killissarititaasooq tamanna maalaaruteqartarfiup sivitsorsinnaavaa, tamatumani immikkut ittunik pissutissaqartoqarpat.

Imm. 7. Siulittaasup maalaaruteqartarfiup allattoqarfia noqqaaffigisinnaavaa inissiaq maalaarutigineqartoq suliamut attuumassuteqanngitsunit takuniarlugu misissorteqqullugu. Suliami pineqarlutik ilaasut sivikinnerpaamik sapaatit akunnera ataaseq sioqqullugu aggersarneqassapput. Takuniaalluni misissuinnermut aningaasartuutit Naalakkersuisunit akilerneqassapput.

Imm. 8. Suliami pineqarlutik ilaasut takkunnerminni maalaaruteqartarfimmut nassuiaateqarsinnaanngillat.

§ 86. Misissuinerit § 85, imm. 4-mi taaneqartut naammassinneriniit kingusinnerpaamik sapaatit akunnerisa sisamat qaangiunnerini maalaaruteqartarfiup allattoqarfia suliaq inassutitalimmik saqqummiunneqarnissaanut siunnersuusiussaaq, taannalu siulittaasumit saqqummiunneqassaaq. Siulittaasup inassutigineqartoq akuerippagu, siulittaasup inassutigineqartoq maalaaruteqartarfimmut saqqummiutissavaa.

Imm. 2. § 85, imm. 6 naapertorlugu akissuteqartoqarani piffissamut killiliussaq naappat, maalaaruteqartarfiup akissuteqannginneq illuatungiliuttumut pitsaanerpaamik sunniteqartussatut nassuiarsinnaavaa, pingaartumillu taassuma saqqummiussaa aalajangiinnermut tunngavigisinnaallugu.

Imm. 3. Ineqarneq pillugu maalaaruteqartarfiup aalajangigai nalinginnaasumik amerlanerussuteqarnikkut aalajangiiffigineqassapput. Taasisut amerlaqatigiippata siulittaasup taasinera aalajangiisuussaaq. Ineqarneq pillugu maalaaruteqartarfik aalajangiisinnaatitaavoq, siulittaasooq taassumaluunniit sinniisussaa ikinnerpaamillu ilaasortat marluk taakkuluunniit sinniisussaata najuuppata.

Imm. 4. Ineqarneq pillugu maalaaruteqartarfiup aalajangiineri allattaavinnut allanneqassapput. Aalajangiineq tamanit isumaqataaffigineqanngippat, aamma taarsineq pillugu paasissutissat

ilanngunneqassapput.

Imm. 5. Ineqarneq pillugu maalaaruteqartarfiup aalajangiinera maalaaruteqartumut suliamilu illuatungeriittut peqataasunut allanut allakkatigut nalunaarutigineqassaaq. Aalajangiineq tunngavilersugaassaaq. Aalajangiineq tamanit isumaqataaffigineqanngippat, aamma taasineq taasisullu agguarneqarnerat pillugu paasissutissat aalajangiinermut ilanngunneqassapput.

Imm. 6. Ineqarneq pillugu maalaaruteqartarfiup aalajangiineri Namminersornerullutik Oqartussanut kommunenullu, inissianik attartortitsisuusunut pinngitsoorani malinneqassapput. Namminersornerullutik Oqartussat kommuneluunniit avataaniit allaffissornikkut aqutsisumik isumaginnittuutitaqarpata, maalaaruteqartarfiup aalajangiineri aamma taakkununga pinngitsoorani malinneqassapput.

Imm. 7. Maalaarummik itigartitsineq allaffissornikkut aqutsinermi pisortanut oqartussaasunut allanut suliassanngorteqqinneqarsinnaanngilaq.

Kapitali 15

lkaarsaariarnissamut atuutsilerfissaanullu aalajangersakkat

§ 87. Inatsisartut peqqussutaat manna 1. juli 2005-imi atuutilerpoq.

Imm. 2. Tamatumunnga peqatigitillugu inissianik attartorneq pillugu Inatsisartut peqqussutaat nr. 5, 31. maj 2001-imeersoq, kingullermik Inatsisartut peqqussutaatigut nr. 3-kkut, 15. april 2003-meersukkut allannguuteqartinneqartoq atorunnaarpoq.

Imm. 3. Inatsisartut peqqussutaat imm. 2-mi taaneqartut tunngavigalugit nalunaarusiat allaffissornikkullu aqutsinermi aalajangersakkat pequssut manna tunngavigalugu aalajangersaanikkut allanngortinneqarnissamik imaluunniit atorunnaarsinneqarnissamik tungaannut atuutiinnassapput.

§ 88. § 45, imm. 3 aamma §§ 77, 78 aamma 80, imm. 1 aamma 2 attartornernut, 1. januar 1990 sioqqullugu aallartissimasunut atuutissanngillat.

Imm. 2. Inissiani attartortittakkani namminersortunit pigisani attartornerit, Inatsisartut peqqussutaata matuma atuutlernissaa sioqqullugu attartornissamik isumaqatigiissuteqarfusut, attartornerup atorunnaarnissaata tungaanut attartornermut aalajangersakkanut isumaqatigiissutit ingerlaannassapput.

Namminersornerullutik Oqartussat, ulloq 12. maj 2005.

Hans Enoksen

/

Jens Napātō

K

Ilanngussaq 1

Ilanngussaq 2

Ilanngussaq 3

Ilanngussaq 4

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut